

四庫全書

史部

欽定四庫全書

浙江通志卷十四

山川

六

寧波府

下

奉化縣

印山 嘉靖寧波府志舊名高青亭山在縣西三十步又以山小而圓土多紅色故名

鳳山 名勝志自華頂逶迤東來與印山相連一名

含光山越五里即華頂山也

北山 嘉靖寧波府志在縣西二里在華頂山之北  
華頂山 嘉靖寧波府志在縣西五里山秀而尊上

有龍湫

西園山 寧波府志在縣西北十里

鯉湖塘山 寧波府志在縣西十里高出衆山有奇

石山頂有龍湫不涸常出雲以為候

石嶺山 成化四明郡志在縣西十五里上有石高

聳狀如人形又名新婦巖名勝志有石如鏡臺宋封石嶺夫人祠

湖山 寧波府志在縣西北二十里剡溪遶後湖水  
遶前故名

橫山 延祐四明志在州西四十里腰山為路二十  
五里奉化縣志上有石文若篆謂之天篆

小丹山 奉化縣志在縣西六十里名勝志四明山  
之南剡源之三石村上有二洞如廣廈可容五六

十人巖罅水流紫紺赤色雲笈七籤所謂四明洞  
天丹山赤水是也

大雷山·延祐四明志在州西南四十里登其山可

見海二百里外

四明洞天丹山圖咏集一名大慈  
晉漢時得道之士多隱此山內有

金雞  
洞

雪竇山 嘉靖寧波府志在縣西六十里上有雪竇

寺西五里有奉慈寺山多奇勝有妙高臺藤龕舍

珠林錦鏡池石竇千丈巖瀑布泉桃花坑龍隱潭

宋理宗嘗夢其處御書應夢名山賜之故有御書

亭雪竇寺志按輿圖自天台摘星峰歷華頂至四

明山心東來過二十里雲起為雪竇山又名乳峰

正峰聳峙四山攢拱兩澗出水交會於前又東折

而下逶迤六七里始抵山麓輿地紀勝丹碧照爛

飛簷鱗鱗蔚在青嶂間晨霞暮靄遮露萬狀尤為

勝槩

謝翱夜宿雪竇下方詩眠山枕斧柯獨客愛  
盤阿畏日生塵夢尋仙到鳥窠下方聞夕磬

南斗挂秋河寢服侵雲卷頰泉通瀑和竇分滄海  
月禪入沃洲歌此地精靈聚中宵弄薜蘿王守仁

雪竇山詩窮山路斷獨來難過盡千溪見石壇高  
閣鳴鐘僧睡起深林無暑葛衣寒壑雷隱隱連巖  
瀑山雨森森映竹竿莫訝諸  
峰俱眼熟當年曾向畫圖看

鎮亭山

漢書地理志鄞有鎮亭嘉靖寧波府志在

縣西南一百里西界於越南跨於天台故其鄉為

連山

梨洲山 名勝志在縣西一百里即四明山之西峰

晉時孫興公與兄承公同遊至此偶得梨數枚左

右環視莫見其迹意以為仙物也故號其地曰梨

洲山

桃花坑山 延祐四明志在四明山之上二十里雲之南也山巖壁立數仞延袤數百里巖色紅白相間狀如桃花之初發故名

寶化山 成化四明郡志在縣南三里為邑之案山奉化山 嘉靖寧波府志在縣東南五里一名瑞峰山特起周回三十里四面皆異名東為栲栳山西為龍潭山頂有龍潭南為吳郎山即後潭山北為



南山元史載奉化州山石裂即此山也

九峰山 奉化縣志在縣東六十里九峰突兀產多

烏桕秋霜葉紅爛若春花

鮎埼山 成化四明郡志在縣東南五十五里漢書地理志鄞有鮎埼亭師古註鮎蚌也埼曲岸也其中多鮎鄞後析為奉化縣因以為名

蓬島山 成化四明郡志在縣南四十里為邑之遠案其源來自四明山兀然為諸山之冠山谷間有

龍湫為雩禱之所

石樓山 嘉靖寧波府志在縣西南六十里太平寰宇記在鄞縣南又名石柱山高六百丈

九女山 嘉靖寧波府志在縣南二十五里

小梅山 奉化縣志在縣南三十里

勞山 馬跡山 奉化縣志俱縣南二十五里

三山 延祐四明志在州南五十五里屹立大海中

如三台然

塘頭山 廟山 大洞山 舊浙江通志俱縣南六

十里

天門山 成化四明郡志在縣南六十里列峰排空

高入蒼莽漢書地理志鄞東南有天門水入海有

越天門山

舊浙江通志一名蜃樓門山瀕海裏港兩峰對峙峇天門然舒岳祥天門山詩

烟樹連天遠漁樵兩地分仙舟滄海路僧錫石橋雲陰壑收虹影空林散鹿羣我來不敢扣冲漠恐

驚聞

剡源山 戴良剡源記奉化之西六十里有山夾溪

而出蒼然深茂者剡源山也以其近剡故名之

新嶺山 嘉靖寧波府志在縣東二十里由舍輞嶺

來山有七十二曲嘉靖間更嶺道於後隴斐關平坦行人便之謂天平嶺

大樣山 嘉靖寧波府志在縣東八十里

石昌山 嘉靖寧波府志在縣東一百里

鄞城山 成化四明郡志在縣東五十里古鄞城在下舊志云即赤堇山有草曰赤堇鄞以此名而加

邑馬

貌頭山 清涼山 馬頭山 舊浙江通志俱縣東

九十里

青錦山 嘉靖寧波府志在縣北一里一名蓮花巖

銅山 寧波府志由日嶺出其山甚尊周圍三十里

孝感山 奉化縣志在縣東北一十里相傳昔人喪

父廬墓側天忽降甘露草木花皆純白故名

金鐘山 嘉靖寧波府志在縣北十里形如鐘

漢城山 延祐四明志在州東北二十里山有五代

漢時城基

樓鑰漢城山詩城復于隍遺舊基山雲漢漢草離離當時雷鼓聲沉後留得寒

巖伴  
落暉

四明山 成化四明郡志在縣西北六十五里遠連

會稽近接天台

詳鄞縣

三嶺山 奉化縣志在縣北十里

赤莧山 元和郡縣志在縣東十里嘉靖寧波府志

夏侯曾先地志云亭頭有赤莧山秦始皇遣徐福

求訪神仙至此或云昔有赤莧仙人常居此山因名

江口山 嘉靖寧波府志自四明山分為雪竇諸山東衍至此而止山上有塔山半有清水菴俯瞰長江山陰為鄞境山陽為奉化境

梅山 延祐四明志在州西南二十五里或謂梅福曾遊此

英馬山 寧波府志在縣北三十里相傳有神馬常

夜出故名

大小晦山 嘉靖寧波府志在縣西六十里即四明山南來之兩峰四明洞天丹山圖咏集宋應則入山景色秀麗既而冥晦故云大小晦

岳林山 名勝志在縣東北五里梁大同初建崇福寺於此

黃甘嶺 嘉靖寧波府志在縣西二十五里

毛嶺嶺 嘉靖寧波府志在四明山之南接大小晦



山巖谷崎嶇行者艱阻宋紹興初有毛居士者鑿山以便往來

六詔嶺 寧波府志在縣西百里相傳王右軍常隱此曾詔起之舊志名陸照誤

唐興嶺 嘉靖寧波府志在縣西一百里通紹興府界

桃花嶺 嘉靖寧波府志在縣東南十五里即奉化山之東麓

山隍嶺 寧波府志在縣南五十里通西店驛寧海

縣

柵墟嶺 嘉靖寧波府志在縣東南六十里宋建炎

間立寨於此守戍亦海道一要衝也

寨嶺 寧波府志在縣東四十五里通東南邊海

清修嶺 嘉靖寧波府志在鷓鴣山下通鄞之小溪

五嶺 嘉靖寧波府志在縣東三十里桑社舉通白

社金溪

千丈巖 雪竇寺志此雪竇之勝懸崖飛瀑又名飛

雪巖

鄭清之題雪竇千丈巖詩並海危峰駕六鰲  
招提深處綠周遭松枝直上蛟龍起濤勢飛

來兕虎嗥坐向亭空雲作伴待看身與月  
爭高山靈意我酬清賞為酌冰泉讀楚騷

徐島巖 四明龍薈在雪竇西十五里重崖峭壁數

百仞瀑布冬夏不絕巖下有神龍宅焉

獅子巖 延祐四明志在州東五十里狀如獅子

周家巖 嘉靖寧波府志在華頂山內

聖井巖 嘉靖寧波府志在清涼山東南

棠巢 嘉靖寧波府志在公棠山

渠水 漢書地理志句章有渠水東入海

北渡江 舊名奉化江 延祐四明志源於四明之鎮亭山

出州之惠政橋下與諸水會南來亘府城之東然後與慈溪江會而入海

謹按奉化當漢時鄞句章二縣境舊志云古句章縣在江口山北光溪境上漢書所謂渠水疑即奉化江也故並列之

萬壽湖 寧波府志在縣東五里即新婦湖本縣放

生之處又名放生湖

廣平湖 奉化縣志在縣東北五里一名寺後湖

范家河 嘉靖寧波府志在縣北一十里通大江

詳見水利

西錦溪 奉化縣志自華頂山下過石棋盤東流入

城西水門至縣南嘉會橋俗謂之蛇腹溪以兩端稍

狹也出城東水門至方勝碑

剡源溪 至正四明續志在州西七十里導自陸照

左溪會同流於公棠逾泉溪會於三江口入北渡

達於海

舊浙江通志自四  
明山來其溪九曲

金溪 嘉靖寧波府志在縣東五十里源發金菽山

東北過白杜河北入北渡江

隱潭 四明龍蒼在縣西北五十里潭居兩巖之下

兩巖相抗壁立數百仞仰以窺天僅如數尺瀑泉

循崖而落水寒石潔聳人毛骨每遇旱禱旋應如

響

郊修輔隱潭詩在昔知何人鑿破青山骨飛泉  
直下來千尺瀉條忽兩壁蒼翠間一陣風雷突

傍無塵埃跡中有蛟龍窟寒氣不可嚮  
猛勢豈能屈安得當年為霖濟萬物

耀碑潭 延祐四明志在州東二里故老云官清則

潭清

陳著耀碑潭詩微風蒙水自成碑清月磨潭不受疵萬里此通歸去路扁舟堪載送行詩

靈濟泉 名勝志在縣西南舊名包家潭

透瓶泉 延祐四明志在州東三里以磁器貯之水

透瓶外

裏港海 奉化縣志在縣南六十里自湖頭渡分港

入天門山至鮎埼接寧海浮溪

鎮海縣

印山 延祐四明志在縣東二里嘉靖定海縣志地

湧一石形方如印

詳奉化縣

梓蔭山 延祐四明志在縣東一里寧波府志東北石壁陡起下有泉水

巾子山 成化四明郡志在縣東北二里與候濤山對峙為風濤蔽障

招寶山 吳萊甬東山水古跡記東徧海或云他處見山有異氣疑下有寶或云東夷以海貨來互市



必泊此山嘉靖寧波府志縣東北二里舊名候濤山之東南峙一小山僅高尋丈名昌國山潮汐於

此分流舟行可達昌國

謝翱採藥候濤山宿山頂精藍夜中望海詩蛟門南

去島此地望迢迢積濕侵幡黑生寒入夢飄見燈歸船夜聞渴解衣朝土植皆為藥山枝不滿樵暗光珠母徙秋影石花消擬候槎回漢寧甘客老遼却尋徐福島因問始皇橋於彼看日出羽旌馬可招

金雞山 延祐四明志在招寶山外屹立海中

蛟門山 名勝志在縣東海中約十五里一名嘉門

山環鎖海口吐納潮汐有蛟龍穴處時興颶風怪浪古稱蛟門虎蹲天設之險即此

虎蹲山 嘉靖寧波府志在縣東五里屹立海口以形得名

游山 延祐四明志在縣東二里海中

烏石山 嘉靖定海縣志在縣東南四十里山巔石色黝黑故名有巨人跡濶六寸長一尺五寸云佛跡世傳舍利始自此山飛入阿育王山

盤輿山 延祐四明志在縣東南七十里水繞太白  
山陰而出凡三十六盤宋儒習菴先生陳塤墓在  
焉

慈輿山 延祐四明志在縣西南九十里古傳左慈  
隱此

伏龍山 嘉靖定海縣志在縣西北八十里一名箸  
山首尾跨東西海門蜿蜒如龍中有千丈巖刺史  
門石壇乳井海眼泉

澤山 延祐四明志在縣西北八十里舊名櫟山宋  
吏部郎黃震改今名

施公山 延祐四明志在縣西北九十里北瞰大洋  
商舟往來多苦海寇元至元間縣達魯花赤張進  
勅巡檢司民乃安居嘉靖寧波府志今置烽堠其  
上

龍頭山 嘉靖定海縣志在縣東南十二里側有葫  
蘆嶠縣令金九成築寨嶠口建樓於上以防海

石門巖山 寧波府志在縣西南二十里陳山在東  
龍山在西儼若二門故名

徐家巖山 寧波府志在縣西北七十里有五嶺通  
往來

石衙門山 舊浙江通志青雷頭山東南海中數峰  
崛起潮汐經流其中旁午為十六門亦名十六門  
山

瑞巖山 嘉靖定海縣志在縣東南八十里有十二

峰宋大中祥符五年有芝草生於青松峰之上守  
臣康孝基奏聞勅獎紀瑞云

雁門嶺 寧波府志在縣西北六十五里西南慈溪  
界

大浹江 名勝志在縣南城外自蛟門海洋分派為  
支江向西沂流七十里抵郡城三港口分流西南  
六十里至鄞縣它山堰西北二百里抵上虞縣之

通明壩

輿地廣記定海有大浹江越滅吳將遷吳  
王夫差於甬東韋昭以為句章東決口外

洲是也寧波府志晉安帝時孫恩寇上虞劉裕戍  
句章出戰退還決口宋高宗航海亦由決口而出

黃崎江 寧波府志在縣東南一百十里自崎頭海

洋分派為支江西北流約半潮至蛟門出大海

梅江山 寧波府志在縣東南十里自崎頭海洋發

潮西北流入烏崎頭山港經大嵩通於海

靈緒湖 嘉靖定海縣志在縣西北靈緒五都周環

二十里

鳳浦湖 嘉靖定海縣志在縣西北靈緒三都周環

十八里

西河 舊浙江通志在縣西北四十里靈緒一都自  
慈溪縣香山發源東流至靈緒二都由澥浦入海  
西流向斗門山十五里合大河

澥浦 舊浙江通志在縣西北五十五里即古之渤  
澥

玉泉 延祐四明志在縣東北三十里廣福院前味  
甘色白烹茶為勝



象山縣

象山 成化四明郡志在縣治北半里形如伏象其  
峰圓聳又名圓峰東首大老巖巖下有圓峰故祠  
鳳躍山 成化四明郡志象山瞬峰唐乾符二年有  
鳳翔於上

王字山 象山縣志在縣東五里頂平夷如王字因  
名

鼓吹山 延祐四明志縣東八里其峰翠然孤峻天

將雨先有聲如鼓吹鳴

向平山 成化四明郡志在縣東三十里其頂平廣數十畝

雙泉山 嘉靖寧波府志在縣東四十里大海中上有二穴出泉味極甘冽巖上有巨人跡上馬石相傳安期生常游於此故又名道人山

瑞龍山 嘉靖寧波府志在縣東南十里又名烏龍山周回盤屈如伏龍故名

爵溪山 嘉靖寧波府志在縣東南三十里

小睦山 象山縣志在縣東南四十里

大睦山 象山縣志在縣東南海中一百里

西殊山 象山縣志在縣東南海中六十里

東殊山 象山縣志在縣東南海中八十里

韭山 象山縣志在縣東南一百里大海中產大韭

遍地雲嵐初霽則蜃氣煥發樓臺殿閣龍鳳之形  
變態萬狀最為奇觀

馬鞍山 嘉靖寧波府志在縣東南一百二十里其  
形類馬鞍故名

秋閑山 象山縣志在縣東南海中一百四十里

大薤山 嘉靖寧波府志在縣東南二百里山產大  
薤自小睦至此俱海中山過此則巨浸茫茫一望  
無際

瑞雲山 嘉靖寧波府志在縣北十里逶迤起伏狀  
如飛雲

東臯山 嘉靖寧波府志在縣東北十里內有小穴  
泉涌不竭名曰旱井又名甘泉

洪水山 嘉靖寧波府志在縣東北二十里

西山 珠巖山 嘉靖寧波府志俱縣東北三十里

大柴山 舊浙江通志在縣東北二十五里山峰秀

出如筆

新羅嶽山 舊浙江通志在縣東北二十里舊傳暹

羅人繫舟於此以暹為新俗音之訛

屏風山 舊浙江通志在縣東北三十五里過此為  
湖頭渡乃鄞奉之地

珠山 嘉靖寧波府志在縣東北三十里山頂一石  
圓聳如珠因名蟠延廣濶鎮都凡四

玉泉山 嘉靖寧波府志去珠山十里山下出泉色  
瑩如玉味極甘冽

煉丹山 名勝志在縣治西一里梁陶貞白修煉於  
此

鄭行山 延祐四明志在縣西北十里舊有鄭行居

此舉

萬松山 名勝志在縣西北三十里麓有智門寺

李源

游萬松山詩秋出越王闌叢林牛斗間坐看東海月飛上萬松山有客乘驄至逢僧射蜃還石床如聽潺湲

塔嶺山 舊浙江通志在縣西北十里

大雷山 嘉靖寧波府志在縣西二十里盤踞數十

里

白巖山 嘉靖寧波府志在縣西北三十里

下沙山 舊浙江通志自白巖東過數步由此至蝦蟆嘴可入於海

蒙頂山 成化四明郡志在縣西北四十五里上有巖曰花氣巖夏旱少有雲氣必雨

五雷山 嘉靖寧波府志在縣西北四十里有峰相疊而下故名謝仙所生故址

姜嶼山 嘉靖寧波府志在縣西北五十里由此越



海登陸則為奉化境

橫山 嘉靖寧波府志在縣西北五十里自蒙頂山  
與蒼蓋山交峽橫於台明之境故名

白石山 嘉靖寧波府志在縣西北六十里海港中  
為奉象之境

烏嶼山 嘉靖寧波府志在縣西北八十里孤懸海  
中圓如小珠為鄞奉分境

鷄籠山 延祐四明志在縣西南五里下有鶴廟

玉几山 延祐四明志在縣南十五里縣治案山

冠蓋山 嘉靖寧波府志在縣西南三十里頂列五

峰如冠蓋相望

五師山 延祐四明志在縣西南四十里昔有五僧

修道於上

靈巖山 嘉靖寧波府志在縣西南四十五里巖石

奇怪極其天巧有瀑布倒流百餘丈

太平山 象山縣志在縣西南五十里

玉女山 象山縣志在縣西南九十里

石浦山 嘉靖寧波府志玉女南去五里中為石浦

所

環翠山 從家山 嘉靖寧波府志俱縣南十五里

三萼山 延祐四明志山有三峰春時雜花交發綺

麗可觀

鷄鳴山 嘉靖寧波府志在縣南七十里

甌瓦山 師姑巖山 面現山 嘉靖寧波府志面

縣治而案海上一望無際俱縣南八十里

青部山 版場山 嘉靖寧波府志俱縣南九十里

后門山 嘉靖寧波府志在縣南一百里跨山而城  
為昌國衛

東門山 嘉靖寧波府志在縣南一百二十里海中  
兩峰對峙即漢書所載天門也高二百丈周二十  
五里明初建衛於此有昌國舊城先未析象山時  
以山在南海中接寧海之東境故名東門亦海道

之要衝也

互見  
奉化

大門山 石壇山 嘉靖寧波府志俱縣南一百三

十里

東西濤山 嘉靖寧波府志在縣南海中一百二十  
里四面風濤未嘗少息因名

大佛頭山 名勝志高出海中諸山數百丈周一百  
餘里日本入貢以此山為向道內平曠膏腴耕種  
甚利事林廣記有東仙源為海中福地即此

台明嶼山 嘉靖寧波府志兩山對峙於中流為台

明二郡分境俱縣南一百五十里

秋蘆門山 楊大嶼山 嘉靖寧波府志踰此則為

東甌境俱縣南二百里

石門嶺 嘉靖寧波府志在縣西北六十里寧象分

界

西溪嶺 寧波府志在縣西南五十里象寧分境

黃部嶺 嘉靖寧波府志在縣西南九十里

黃枝巖

嘉靖寧波府志在縣西南八十里界寧海

司頭嶺

嘉靖寧波府志在縣西南一百二十里

蓮花巖

嘉靖寧波府志在縣西十里色赤如千葉

蓮花

鬼洞巖

嘉靖寧波府志在縣西五十里巖洞空濶

容十數人上有天窗下有石几

佛頭巖

延祐四明志在縣南二十五里巖高千餘

丈上如佛首中斷如蜂腰岌然欲搖又名搖環巖

定風巖 象山縣志在縣東十里許一名旋倒山上  
八面風起至此獨息因名

鋸門洞 四明龍薈在縣東南三十里在鋸門山巖  
半壁中濶三丈許其圓如規洞內有二潭中一石  
筍如柱下有橫石如閩洞口石壁兩分如左右手  
內案小睦山如圓珠外案大睦山如筆架潮至洞  
下聲震如雷宋寶慶志云世傳五龍聚會於此每  
歲上巳邑人候潮退入洞觀之有巖花石乳繽紛



懸墜下有五色石子瑩潤光潔類寶石可愛歲旱  
或投以朱書鐵簡風雨立至

北港 嘉靖寧波府志東達於洋西距鮎埼由陳山  
渡一潮至方門再潮至烏埼三潮至府城下

玉帶溪 象山縣志源出鳳躍山流至永安橋自西  
而東經儒學前入長樂橋以其環遶縣市中故名  
玉帶溪

海 嘉靖寧波府志東曰錢塘南曰大睦西南曰東

門皆蕃舶閩船之所經自錢塘而北則定海自東門而南則台温

### 定海縣

定海山 在縣東元名舟山有山峯如枕海之湄以舟之所聚故名舊昌國縣山也明初縣廢隸昌國衛

國朝康熙二十五年海氛蕩平開復舟山

聖祖仁皇帝御書定海山三字勒石建亭永鎮東溟二十

七年建縣治即

賜名定海縣而改舊定海為鎮海縣

大椎山 大德昌國州志即州治照山儼若屏障在  
前四望其形如一

觀山 定海縣志在城東南半里宋建道隆觀於其  
下故名

黃楊山 大德昌國州志在州東北通陸之處極巉  
巖險峻一峰傑出人目曰黃楊尖

翁山 延祐四明志一名翁洲州東三十里徐偃王所居也今城址猶存抱樸子論古仙者之藥以登山為上而以海中大島嶼若會稽之東翁洲之類者次之乾道間畊者得銅鼎一無足而有耳亦不穿中可容斗餘而底之埃墨猶在遂歸進士陳

節謂煉丹之遺器

定海縣志葛仙翁煉丹於此故名

東霍山 吳茱甬東山水古跡記山多大樹徐市蓋駐舟於此大德昌國州志在海東北環以大洋世

傳徐福至此山有石宛如一稗修竹森立風枝掃拂常無纖塵

甬東山 定海縣志在縣東十里史記所謂吾置王

甬東之地蓋東南之主山也

路史史記句踐平吳從夫差於甬東杜預

云甬東乃句章東海中洲地也

鼓吹山 定海縣志在縣東四十里山之陰曰戰洋

曰馬巖古有徐偃王祠值風雨晦冥隱隱若有鼓

吹聲居人以此名之

鎮鰲山 定海縣志在城西北隅宋元州治俱在山

麓今為總鎮府宋淳熙間賜名鎮鰲

蓬萊山 吳萊甬東山水古跡記昌國北界有蓬萊

山衆山四圍峙立旋繞小嶼屹如千尺樓臺中有  
紫霞洞隱隱有神仙題墨漫不能辨

補陀洛伽山 普陀山志在昌國東海中今屬定海

縣去郡城約三百里補陀洛伽蓋梵名也華言小

白花華嚴經言善財第二十八叅觀音菩薩說法

處又曰海岸孤絕處一名梅岑以梅子真曾煉藥於此也

石門山 大德昌國州志在州東通陸迥絕處名極樂嶼下瞰大海渺無涯涘旁有兩山對峙如門出入

雙髻山 定海縣志在縣北十里有二峰如髻矗立天表諸山環繞為縣治之主山

蘆花山 鳳尖山 定海縣志俱縣東五十里

沈家門山 定海縣志在縣東九十里外通蓮花洋  
最為要地

馬跡山 大德昌國州志在海東北安期生洞在馬  
斗門山 定海縣志在縣北三十五里有龍潭

曉峰山 定海縣志在縣西南六里可望日出

大小洛伽山 定海縣志在縣東一百二十里海中  
與普陀接近

龜山 定海縣志在縣南約三里海中為定邑案山



金塘山 定海縣志在縣西約八十里海中周百餘里泉甘土肥洵稱沃壤

岱山 定海縣志在縣西約百二十里海中周迴四百餘里土厚田瘠以漁鹽為業

大榭山 定海縣志在縣西南約八十里海中寬廣百里土肥民稠

蘭山 定海縣志在縣東北約五十里海中

石弄山 延祐四明志在縣東南山石玲瓏故名

馬秦山 定海縣志縣東南約四十里海中

大德昌國州志

昔有碧雲菴馬耆禪師修道於此與黃給事龜年等聯句刻諸石

桃花山 延祐四明志在東南世傳安期生煉丹之所常以醉墨洒石成桃花紋因名

烈表山 舊浙江通志在金塘山西北隔一小港相表裏亦名烈港

鐵杵山 舊浙江通志西南童山首尾大而腰細橫卧海中如杵然

峯峒山 吳萊甬東山水古跡記東從舟山過赤嶼

轉入外洋望峯峒山山出白艾地多蛇

大德昌國州志在海

東山之巔

黃公山 嘉靖寧波府志在昌國東海中昔黃公能

以幻術制虎斃於此山故名

西京雜記東海黃公少時為術能制蛇御

虎佩赤金刀以絳繒束髮立與雲霧坐成山河及  
衰老飲酒過度不復能行其術秦末有白虎見於

東海黃公乃以赤刀  
往厭之遂為虎所殺

塔嶺山 大德昌國州志在黃公山南有石如婦人

狀春月多杜鵑花

順母山 嘉靖寧波府志在縣東海中有石如牛形  
人謂石牛

竹嶼山 大德昌國州志與舟山對境兩山夾峙上  
有叢竹附潮而上者由此謂之竹嶼門

雲嶼山 大德昌國州志與竹嶼對峙山勢稍崇雲  
氣常滃鬱附潮而下者由此謂之雲嶼門

盤嶼山 嘉靖寧波府志與竹嶼山隔海對峙山勢

盤旋故名

寺鐘山 大德昌國州志在秀山去州隔一潮山之  
頂有古佛殿基堦砌儼然傍有井甃以磚凡遇陰  
晦隱隱聞鐘聲因以為名

佛嶼山 大德昌國州志在秀山上有一峰表表持  
立望之儼如丈六金身相旁睨如背負一小佛狀  
甚怪

西蘭山

大若山

檉岸山

淳塗山

舊名  
淳塗

礮石

山 嘉靖寧波府志俱昌國南海中

小竿山 大竿山 崑斗山 麻隴山 蛟山 登

部山 黃砂山 徐公山 雙嶼山 石珠山

嘉靖寧波府志俱昌國東南海中

東勾曲山 石馬山 石牛山 隴山 嘉靖寧波

府志俱昌國東海中

浪港山 深水山 莆隴山 蛇山 竹山 洋山

東蘭山 西枯山 東曉山 東枯山 桑子

山

舊名  
桑石

石蜀山

東胸山

川石山

北壁山

大衢山

小衢山

三星山

冷嶼山

西須

山

須皓山

落華山

青閣山

丁興山

陽

山

陳錢山

嘉靖寧波府志俱昌國東北海中

大磧山

東乳山

東岱山

西胸山

大洋山

弔嶼山

嘉靖寧波府志俱昌國北海中

回峰山

西良山

長塗山

三姑山

灘山

長

白山

西岱山

正策山

吳農山

如岸山

橫子山 冊子山 西桑山 五嶼山 宜山

龜鱉山 嘉靖寧波府志俱昌國西北海中

嘉門山 曉峰山 小茆山 大茆山 三山 砂

羅山 嘉靖寧波府志俱昌國西海中

藿山 黃石山 鷄鳴山 東豸山 大板洋山

西豸山 黃馬乳山 虎頭山 白踏山 大桑

山 青屯山 黃隆山 楊岸山 畫栲門山

小磧山 黃羅門山 大小板山 綠獅山 大



小獨山 廟址山 嘉靖寧波府志皆在海中莫

詳所在

謹按黃公以下諸山遠在海洋  
環述脈境故因嘉靖志存之

書字巖 嘉靖浙江通志一名桂竹嶼俗傳羅隱留  
題於上字蹟隱隱可見

箭巖 大德昌國州志在馬秦後沙上有箭孔故名  
響巖 大德昌國州志在馬秦去州隔一潮巖石玲

瓏遇陰晦則空洞有聲

葛仙峰 定海縣志在金塘山視諸峰為最高世傳  
葛仙翁憇此山有煉丹井久旱不涸

十二峰 舊浙江通志在東胸山峰列十二森秀可  
觀

蓮花峰 大德昌國州志與馬秦山碧雲菴對峙三  
石層出如蓮花上有佛腳跡拄杖印馬跡痕山之  
四隅各有小浮圖地產草一種名長生不死云

玉峰 大德昌國州志在岱山鷄子尖嶺下岡巒秀

拔林樾蒼潤時有白霧蒙其巔人以為福地

盤陀石 天中記明州昌國東海中有盤陀石平廣

可立百餘人下瞰大海正扶桑日出之地燭龍將  
駕天光煥發頃焉一輪涌出其大有不可名者

觀音洞 吳萊甬東山水古跡記自梅岑山東行西

折為觀音洞洞瞰海外巉中裂大石壁紫黑旁罅  
而兩岐亂石如斷圭積伏蟠結晝夜作魚龍嘯吼

聲

善財洞 吳萊甬東山水古跡記梅岑西為善財洞  
峭石齧足泉流滲滴懸纓不斷

龍女洞 普陀山志在潮音洞外有石壁立中宵不  
可測

白泉湖 定海縣志縣東北周環三十里瀦水溉田  
源泉沸涌舊志名富都湖至正四明續志又名萬  
金湖

查浦 嘉靖寧波府志在昌國夏侯曾先地記云吳

伐越次查浦即此

黃馬溪 至正四明續志在州西北五十里南墀水

從柰嶺發源流注於海

芙蓉洲 貝瓊遠清堂記距昌國縣東三百武有洲

曰芙蓉其水縈紆南流以入於海洲之上皆蓮芙

蓉其異名也

海印池 定海縣志在普陀產白蓮


九節龍潭 四明龍薈在翁洲東五里田塍間昔人

汲水得鰻刀斲九段烹諸釜俄頃不見翌日復汲  
於潭其鰻洋洋九節游潭中人皆異之旱往禱焉  
岱山龍潭 四明龍薈在縣東北山上有潭三濶不  
滿丈深不盈尺禱雨投以尺書則有物若鱗若鰻  
者出誠或不至書浮水面不沉

大海 定海縣志東接三韓日本南通閩粵西北直  
抵遼東潮汐往來日有定候

蓮花洋 定海縣志在縣東往洛伽必徑此普陀山

志倭人入貢見大士靈異欲載歸海生鐵蓮花舟  
不能行懼而還之得名以此



浙江通志卷十四

欽定四庫全書

史部  
浙江通志卷十五

詳校官給事中臣戴璐

檢討臣德生覆勘

總校官編修臣倉聖脉

校對官學正臣陳木

謄錄監生臣伍士鵬



欽定四庫全書

浙江通志卷十五

山川

紹興府

興龍山

舊名卧龍山

嘉泰會稽志舊名種山越大夫種

所葬處一名重山種訛成重也寶慶會稽續志按

元微之州宅詩序州之子城因種山之勢盤繞迴

抱若卧龍形故取以為名紹興府志今府署據其

東麓山陰縣署在南麓

姜夔同朴翁登卧龍山詩  
龍尾回平野簷牙出翠微

望山憐綠速坐樹覺春歸草合平吳路  
鷗忘霸越機午涼松影亂白羽對禪衣

國朝康熙二十七年

聖祖仁皇帝南巡駐蹕茲山改名興龍山

火珠山 嘉泰會稽志在卧龍山東隅小而園絕類

龍頷之珠

明一統志在府治  
東按察分司後

蛾眉山 名勝志在火珠山下百餘步石隱起土中

狀如蛾眉

龜山 嘉泰會稽志在府東南二里一名飛來一名  
寶林一名怪山越絕書龜山句踐所起遊臺也東  
南司馬門因以灼龜又仰望天氣覩天怪也水經  
注縣西門外有怪山本琅琊郡之東武縣山也飛  
來從此吳越春秋稱怪山者東武海中山也一名  
自來山百姓怪之號曰怪山亦曰龜山越王無疆  
為楚所伐去琅琊山東武人隨居山下遠望此山  
其形似龜故有龜山之稱紹興府志上有應天塔

今呼為塔山

方千龜山詩遼巖喬木夏生寒牀上雲溪枕上看臺殿漸多山更重却令

飛去即應難李孝光龜山詩山似瑯琊小地將秦望雄越王歌舞處今作梵王宮

陽堂山

名勝志在卧龍山南三里府城跨其脊其

南麓出城外跋於河滢一名鮑郎山山北舊有鮑

郎祠

太平寰宇記郡國志云山有鮑郎祠本名蓋一名信後漢人生好獵死葬於此兒忽夢當

更生開棺視尸儼然但無氣耳人事之頗有靈驗

蕺山

一名戒珠山

名勝志在卧龍山東北三里許產蕺

越王句踐常採食之晉王羲之宅在馬後捨宅為

戒珠寺

白馬山

名勝志在叢山東南一里許土漸削山石

依然

彭山

名勝志在白馬山東舊經云彭祖隱居之地

有助海侯廟

翁洲

嘉泰會稽志在府學之東會稽境郡國志云

徐偃王居滄洲即此

謹按會稽風俗賦注引十道志云翁洲在海中徐偃王所居嘉靖寧波志亦云翁洲昌國東三十里

一名翁山徐偃王常居此唐置翁山縣以此命名二說良是會稽志所云未知何據存以俟考

簞膠河

山陰縣志在縣治東即府河嘉泰會稽志

一名投膠河一名勞師澤

運河

嘉泰會稽志在府西一里屬山陰縣

新河

名勝志在府城西北二里唐元和中觀察使

孟簡所開

鶩池

弘治紹興府志在戴山戒珠寺前舊經云是

王右軍養鶩之所

洗硯池

弘治紹興府志在白馬山下舊經云是王

右軍洗硯處

清白泉

嘉泰會稽志在府治內清白堂側范文正

公記西巖下獲廢井泉甘而色白淵然文餘引不

可竭

魏驥清白泉記清白泉者在紹興卧龍山下郡治內之西隅景泰某年郡守白公得之於

灌莽中究其自實宋寶元二年范文正公守郡以廢井而得既浚滌之遂名曰清白泉異汲斯泉者無媿斯名也後東嘉王十朋來簽郡幕作會稽賦有飲清白以自娛之句豈不因是泉而發與自文正之去泉之廢不知其幾百年今守白公乃得之於既廢之後夫豈偶然者哉

三汲泉 輿地紀勝在卧龍山麓泉甚淺不過有水  
數斗然汲盡已滿未常竭也

靈鰻井

弘治紹興府志在寶林山井有靈鰻時出

見 林景熙寶林鰻井詩雲根藏海眼靈物此中蟠  
吐沫晴巖雨飛陰夏木寒何年化龍去半日待

潮看消長從誰  
問微吟倚石欄

山陰縣 城外  
山川

亭山

嘉泰會稽志在縣西南一十二里太平御覽

晉司空何無忌臨郡起亭山椒極望巖阜基址猶



存因號亭山

侯山 嘉泰會稽志在縣西四里舊經云南湖侯山

迥在湖中俗稱九里山昔時去縣之數也

晉書孔愉傳愉

為會稽內史在郡三年乃營山陰湖南侯山下數畝地為宅便棄官居之朱彝尊侯山讌集詩侯山上放龜臺百尺紅亭鏡裏開試問花源齊列坐何如蘭渚遠浮杯巡檐浦樹迎人出卷幔沙禽拂席迴我欲臨風歌一曲起行松月重徘徊

陳音山 嘉泰會稽志在縣西南四里太平御覽昔

有善射者陳音越王使簡士習射於郊外因死為

冢今開塚壁悉畫作騎射之象因以名山

麻林山 越絕書一名多山句踐欲伐吳種麻以為

弓弦使齊人守之越謂齊人多故曰麻林多以防

吳去縣一十二里

龍尾山 紹興府志在府西南二十里與卧龍首尾

相望

容山 山陰縣志去縣西南二十七里其上平曠可

容故名

六峰山 紹興府志在府城西南三十里有溪出山

麓

峽山 弘治紹興府志在縣西南二十里兩山相峙

故名

項里山 弘治紹興府志在縣西南二十里世傳項

羽流寓於此

嘉泰會稽志有溪清  
澈居民二百餘戶

絹山 嘉靖山陰縣志去縣西南六里石紋如疊絹

土人呼曰絹山

法華山

嘉泰會稽志在縣西南三十五里舊經云

晉義熙中僧曇翼誦法華經感普賢應現因置寺

花徑山

山陰縣志去縣西南二十五里多桃李榆

柳望若雲錦包絡山谷故名

直步山

紹興府志與花徑山相近下有溪入鏡湖

木客山

山陰縣志去縣西南二十七里吳王好宮

室越王使木工三千餘人入山伐木一年無所得

木工思歸而歌木客之吟一夜天生神木其大二

十園其長五十尋陽為文梓陰為榎楠乃伐而獻  
之

蘭渚山 弘治紹興府志在縣南二十七里晉王右  
軍修禊序云此地有崇山峻嶺蓋謂此山也

玉架山

俗呼筆架山

嘉泰會稽志在縣西南三十里三

峰如筆格秀麗可畫

大巖山 紹興府志在府城西南一百十五里山形

若冕旒又名冕旒山宋時宮闕在錢塘者與山相

對

清化山

弘治紹興府志在縣西南一百一十里

趙王尖山

舊浙江通志在府城西南一百二十里

浮丘山

弘治紹興府志在縣西南一百一十里世

傳浮丘煉丹於此

離渚山

紹興府志在縣西南三十里內有謝尚書

塢

柯山

山陰縣志在縣西南三十里山皆石其下有

水曰柯水有石佛高十餘丈

朱彝尊柯山詩柯亭山下路修竹暮紛紛

衆壑千尋暗雙崖一境分江光明草樹日氣冷江雲更憶中郎笛寥寥不可聞

謹按後漢書蔡邕傳注張隲文士傳云邕告人曰昔經會稽高遷亭見屋椽竹東間第十六可以為笛取用果有異聲伏滔長笛賦序云柯亭之觀以竹為椽邕取為笛竒聲獨絕柯山得名以此戴冠府志遺之

寓山 舊浙江通志在府城西南二十五里環山皆

水

聖女山 嘉泰會稽志在縣西二十九里

三山 嘉泰會稽志在縣西九里與卧龍岡勢相連

嘉靖山陰縣志去縣西九里鑑湖中陸游遊息之所

鳳凰山 弘治紹興府志在縣西五十五里

牛頭山 山陰縣志去縣西六十五里唐天寶間改

名臨江山

羊石山 舊浙江通志在府城西北三十六里有石如羊故名

馬鞍山 弘治紹興府志在縣西北四十里狀如馬



鞞唐天寶間改名人安

上方山 舊浙江通志在府城西北四十里與下方山相連有下方寺

塗山 嘉泰會稽志在縣西北四十五里舊經云禹會萬國之所按史記國語禹會諸侯於會稽防風氏後至誅之書曰禹娶於塗山注塗山國名左傳禹會諸侯於塗山杜預注在壽春說者云今濠州也蘇鶚演義云塗山有四一會稽二渝州巴南舊

江州三濠州四當塗縣自越絕等書皆云禹娶於會稽塗山其說不經蓋禹會諸侯於會稽則信而

有徵至娶婦處則好事者傳會於此非其實也

會稽

風俗賦注按左傳哀公七年諸大夫對孟孫曰禹合諸侯於塗山執玉帛者萬國杜預注云塗山在壽春東北孔穎達云壽春縣也又淮南子原道訓禹會諸侯於塗山執玉帛者萬國許慎注云塗山在九江當塗縣愚按漢之當塗晉之壽春此相接之境也當塗後廢壽春今存其說與杜氏相符矣越之舊經與太平御覽並引郡國志云塗山禹會萬國之所以為在越中其說與杜氏許氏相戾唯曾子開等為九域志不膠承襲之非故越州古跡不書塗山可謂得其實矣

謹按禹會諸侯於塗山施宿以為當在會稽史鑄以為當在壽春施宿之言為是而引據未詳考吳越春秋云苗山禹改為會稽苗即茅山又云塗山則塗山即會稽山為禹致羣神之所見史記孔子世家注云守山川之祀者為神謂諸侯也以吳越春秋史記証之塗山當在會稽但不應於山陰別出一塗山或後人傳訛耳若明戴冠府志以左傳南望三塗為塗山則杜注明云太行輜轅清澗謂之三塗未嘗確指山名亦非實據也

西余山 於越新編在府城西北四十二里一名西  
宸謂禹負宸朝諸侯處

碧山 弘治紹興府志在縣西北五十里山有碧石

故名

烏風山

紹興府志在縣西北五十里濱於海有洞

出烏風一名龜山當潮生時遠望之宛然如龜出

沒水中今名白洋山

蜀阜山

嘉泰會稽志在縣北三十五里舊經云山自

蜀飛來帶兒婦二十餘人善織美錦自言家在西

蜀十道志云句踐以寡婦居此令軍人游焉一名

獨婦山

越絕書句踐將伐吳徙寡婦致山上以為死士示得專一也

梅里尖山 舊浙江通志在縣北二十里嘉泰會稽志其陰為梅仙塢以梅福里得名

巫山 嘉泰會稽志在縣北十八里越絕書云越軀

神之官死葬其上嘉靖浙江通志一名梅山漢梅

福居此

戴表元梅山詩梅尉功成後安知不此來路達耕者問山是化人開樵隴低通海茶

村暖待雷玄談亦可隱不用壑蒿萊

下馬山 山陰縣志去縣北二十五里舊經云秦始

皇東巡息駕於此有石如蟾亦名蟾山俗名蝦蟆

山山多露石兩崖夾水石骨橫亘水底曰石檻

璜山 弘治紹興府志在縣北三十里滙小江勢小而環抱若璜故名

大峰山 紹興府志在府城北三十五里多棹白花  
黃柑黃實多硤石有洞焉石投之冷然有風曰風  
洞

玉山 嘉泰會稽志在縣北三十三里舊經云唐貞  
元元年浙東觀察使皇甫政鑿此山為斗門八閘

洩水入江按唐書地理志山陰縣北三十里有越  
王山堰皇甫政鑿山以蓄泄水利與舊經相合即  
此

石城山 嘉泰會稽志在縣東北三十里吳越備史

乾寧二年錢鏐討董昌攻石城去越三十里即此

古博嶺 舊浙江通志在府城西南四十五里羣峰

交峙中有一徑南達楓橋至諸暨界曠寂稀人烟

往往虎豹栖止俗訛為虎博嶺

姚寬古博嶺詩北  
風獵獵駕寒雲低

歷平川路欲昏人馬忽驚  
俱辟易一聲乳虎下前村

看怕嶺 嘉靖山陰縣志在縣西南八十里其路峻

險行者皆懼

白峰嶺 弘治紹興府志在縣西南一百十里

刑塘嶺 弘治紹興府志在縣西五十五里世傳禹

築塘斬防風氏故名

會稽風俗賦注賀循會稽記云防風氏其身三丈刑者不

及乃築高塘刑之故曰刑塘

古城嶺 萬曆紹興府志在府城西五十里越王允



常築城處

大嶺 萬歷紹興府志在府城西六十五里一名梅

山嶺

越王崢 萬歷紹興府志在府城西南九十里越王

句踐於此棲兵又名棲山

仙人洞 霏雪錄在山陰縣西北六十里越棲峰下

乃宋九江葛秋巖慶龍游息之所王君理得函骨

於石洞至今號葛仙洞

磨鏡石 弘治紹興府志在鏡湖邊任昉述異記世傳軒轅氏鑄鏡於此今石尚存

西小江 山陰縣志在縣西北四十五里其源在諸暨之浣江分為二派初出天樂徑流蕭山轉東北達於海天順元年太守彭誼建白馬山閘以通三江口之潮閘東盡漲為田於是江水不通於海矣

互見  
水利

錢清江 萬歷紹興府志府城西五十里浦陽江下

流漢劉寵投錢處今通為運河

陳淵錢清江待潮詩江潮來去自有

時扁舟閣淺心如飛岸容霜竹青照眼春信梅花  
香撲衣天寒郵江道路阻歲晏錢清風俗非故國  
回首二千里落日看盡行雲歸柳曾過錢清江詩  
浦陽配三江猶以小絮大我家其始源涓流激湍  
瀨到茲直達海混混百川會歸墟豈其豐出坎亦  
非殺羸縮總如一真源自霧浦浮舟絕江津浪觸  
銀花碎朝曦如青蓮升光破烟靄歸雲回望長鴻  
飛渺天外高啟夜發錢清詩錢清渡頭船夜開黃  
茅苦竹聞猿哀客官醜酒水神廟風雨滿江潮正  
來蒸飯炊魚坐篷底不覺舟行兩山裏擢歌早過  
越王城東方未白啼鴉起朱彝尊初秋泊錢清江  
詩錢清江口水平隄雲木參差磴不齊川靜未聞  
鴻雁渡雨昏時有鷓鴣啼逃名梅尉來吳市避地  
梁生入會稽枉自含情臨北渚秋風嫋嫋草萋萋

鏡湖 名勝志在城南三里一名鑑湖任昉述異記

軒輳氏鑄鏡湖邊或云黃帝獲寶鏡於此又云本  
王羲之語山陰路上行如在鏡中游又名長湖水  
經注云浙江又東北得長湖口湖廣東西百三十  
里北瀉長江又名太湖郡國志云石帆山北臨太  
湖水深不測傳與海通源出會稽之五雲鄉綿跨  
山會二縣周三百五十八里總納二縣三十六源  
之水東至曹娥西至西小江南至山北至郡城其

初本通潮汐漢永和五年太守馬臻始築塘畜水  
界湖為二曰東湖曰南湖南湖屬山陰東湖屬會  
稽唐玄宗賜秘書監賀知章鑑湖一曲又名賀監

湖自宋熙寧以後湖漸廢為田今俗呼白塔洋僅

長十五里即鏡湖處也

互見水利會稽續志  
本名慶湖賀鑄慶湖遺老

集序云賀本慶氏吳王僚遇公子光之禍王子慶  
忌奔衛妻子并度浙水隱會稽上越人哀之表其  
族曰慶氏名其田曰慶湖今為鏡湖傳訛也漢安  
帝時避帝本生諱改賀氏水亦號賀家湖家牒載  
謝承會稽先賢傳叙畧如此宋之問泛鏡湖南溪  
詩乘興入幽樓舟行日向低巖花候冬發谷鳥作

春啼沓嶂開天小叢篁夾路迷猶聞可憐處更在  
若耶溪陸游鑑湖歌千金不須買畫圖聽戎長歌  
歌鑑湖湖山竒麗說不盡且復與子陳吾廬柳姑  
廟前魚作市道士莊畔菱為租一灣畫橋出林薄  
兩岸紅蓼連菰蒲村南村北鴉陣黑舍東舍西楓  
葉赤每當九月十月時放翁艇子無時出船頭一  
東書船尾一壺酒新釣紫鱗魚旋煮白蓮藕從渠  
貴人食萬錢放翁艇子長便便暮歸稚子迎我笑  
遙指一抹  
西村烟

菱塘湖

嘉靖山陰縣志在縣西五十里湖多菱葑

故名廣三千七百二十餘畝近被侵佔為田水不

甚蓄

互見  
水利

黃鱖湖 舊浙江通志在府城北十五里

餘支溪 名勝志鏡湖之別派也水經注云山陰縣

西南四十里有二谿東谿廣丈九尺冬煖夏冷西谿廣三丈五尺冬冷夏煖二谿北行三里至徐村合成一谿廣五丈餘而溫涼不雜蓋山海經所謂茗水也

射浦 越絕書司踐教習兵處也去縣五里

查浦 山陰縣志在縣西一百里句踐陳兵處

紀家匯 弘治紹興府志在縣西南一百里

沈釀隸 嘉泰會稽志在若耶溪東十道志鄭弘舉  
送赴洛親友餞於此以錢投水依價量水飲之各  
醉而去一名沈釀川

蘭渚 蘭亭考越州山陰有蘭渚在縣西南二十五  
里王右軍曲水賦詩作序於此

離渚 弘治紹興府志在府城西三十里發源自唐  
里六峰諸山縈迴合離渚溪



懽潭 山陰縣志去縣西南一百三十里水清味甘  
右軍墨池 弘治紹興府志在縣西南二十五里按  
宋志云每朝廷恩命至池水必先黑

玉帶泉 舊浙江通志在琵琶山下泉味甘而冽色  
微白故謂之玉帶

半月泉 西溪叢語李紳天衣寺詩殿涌全身塔池  
開半月泉此泉隱巖下雖月圓只見其半最為佳  
處紹興初僧法聰鑿開巖上名曰滿月甚可惜也

海 明一統志在縣北三十里曹娥錢清浙江三水  
所會謂之三江海口

會稽縣

城外山川

會稽山 嘉泰會稽志在縣東南十三里周禮揚州  
之鎮山曰會稽山海經云會稽之山四方其上多  
金玉其下多砮石勺水出焉史記云禹會江南計  
功命曰會稽會稽者會計也吳越春秋云禹登茅  
山以朝羣臣乃大會計更名茅山曰會稽山輿地

志云一名衡山其山有石狀如覆鬴亦謂之覆鬴

山十道志云一名苗山一名塗山吳夫差入越越

王以甲楯五千保會稽山水經注會稽之山古防

山也亦名鎮山又曰棟山越絕云棟猶鎮也太平

御覽隋開皇十四年詔會稽等山並就山立祠唐

開元十四年封四鎮山為公會稽曰永興公有南

鎮永興公祠

柳貫望會稽山詩城東鑑湖道水光  
翻夕鷗雲破青蘿靡稽峰芝掌浮悠

然動予矚王女開明眸固知穴可探却恐書難求  
蒲運浩如海微風挾輕舟前山與後嶺導從森幢

旒誰將北斗旗漸進東瀛洲  
桂枝倘堪折哀白媿重游

宛委山 名勝志在縣東南十五里上有石簣壁立

千雲升者累梯而上十道志石簣山一名宛委一

名玉笥會稽風俗賦韞玉有笥有懸崖之險亦名

天柱山昔禹治水歌功未成齋戒於此得金簡玉

字因知山河體勢遁甲開山圖云禹治水至會稽

宿衡嶺宛委之神奏玉璽書十二卷禹開之得赤

珪如日碧珪如月是也

吳越春秋宛委山中藏金簡書禹巡衡山見赤繡文

衣男子自稱元夷蒼水使者云欲得簡書知導水之方請齋於黃帝之岳乃登山發石果得其文

秦望山 水經注在州城正南為衆峰之傑秦始皇

登之以望南海自平地以取山頂七里縣陞孤危徑路險絕記云扳蘿捫葛然後能升山南有嵯峴峴裏有大城越王無餘之舊都也

刻石山 嘉泰會稽志在縣西南七十里一名鸞鼻

山水經注秦始皇登稽山刻石記功尚存山側孫

暢之述征書云丞相李斯所篆也

元豐九域志秦始皇刻石前有

方石數丈云是始皇坐兩廂分石八所云是丞相  
以下坐西溪叢語越王棲於會稽宮城避於此又

云城  
避山

望秦山

嘉泰會稽志在縣東南三十二里始皇登

此以望秦中一名天柱峰亦名卓筆峰

雲門山

雲門志畧在府城南三十里晉義熙二年

中書令王獻之居此有五色雲見詔建雲門寺

水經

注玉笥竹林雲門天柱並疏山創基架林裁宇割  
澗延流盡泉石之好巖維同韓員外宿雲門詩中  
令遺踪在仙郎此夕過潭空觀月定澗靜見雲多  
竹岸烟深色松聲雨點和萬緣俱不有對境自垂

蘿劉長卿上巳日與鮑侍御泛若耶游雲門詩蘭  
棹漫轉停汀沙應接雲峰到若耶舊浦滿來移渡  
口垂楊深處有人家永和春色千年在曲水鄉心  
萬里賒更見漁舟時借問桃源幾路入烟霞高似  
孫別雲門詩四首雲邊更看松風流王謝舊  
行踪不知誰繼諸賢後半夜來聽六寺鐘

何山 雲門志畧在雲門西一里宋何子季所居王  
十朋謂秦刻石在其上

若耶山 雲門志畧在府城南四十四里下有采蓮

田東又有若耶嶺舊經云葛玄學道於此

太平寰宇記若

耶山葛玄所隱桐儿化成白麕三足共行二  
頭並食山下有壇壇旁有石謂之葛仙公石

赤堇山 名勝志在會稽山南舊經歐冶子為越王  
鑄劍之所一名鑄浦山越絕書赤堇之山破而出  
錫亦名錫浦國策破堇山而出錫薛燭曰赤堇之  
山已合無雲張景陽七命耶溪之銚赤山之精山  
傍有井歐冶子取水淬劍曰歐冶井有洞曰玉洞  
穀米山 明一統志在府城東南七十里十道志舜  
常耕此山天降嘉穀故名

白鶴山 陽明洞天圖經在縣東一十六里孔靈符



會稽記云此山在射的山西南水中有白鶴為仙人取箭又名箭羽山

射的山 寶慶會稽縣志在縣南十五里與白鶴山相連水經注遠望山的狀若射侯故謂之射的射的之西有石室名為射堂年登否常占射的以為貴賤之準的明則米賤的昏則米貴

葛山 明一統志在府城東一十里句踐種葛於此  
刺涪山 萬厯會稽縣志在雲門山南一名明覺山

蓋明覺寺基也頂有池大旱不涸

石帆山 弘治紹興府志在府城東十五里水經注

山東北有孤石高二十餘丈廣八尺望之如帆因

以為名

雲門志畧在射的山北石壁高數十丈中共少紆狀如張帆陸游宿石帆山下詩繫

舟禹廟醉如泥投宿漁家月向低濕翠撲人濃可掬始知身在石帆西

鹿池山 名勝志在會稽山之東北嘗有白鹿游此

水經注云鏡湖水自東亦注江通海水側有白鹿

山又曰湖北有三小山謂之鹿野山按吳越春秋

乃越之麋苑也上有石室相傳為越王游息處

洞浦山 嘉泰會稽志在縣東南二十四里舊經云

即湖南龍尾山西南之趾

箬蕢山 嘉泰會稽志在縣東十二里舊經云秦始皇

皇東游於此供芻草俗呼遶門山

少微山 名勝志距鹿池二里宋職方郎齊唐隱居

之所

土城山 嘉泰會稽志在縣東六里吳越春秋王得

西施鄭旦飾以羅縠教以行步習於土城教於都  
卷三年學服而獻吳王

寶山 弘治紹興府志在縣東南二十五里一名上  
皐山山崦有趙家壘即南宋攢宮

錫山 嘉泰會稽志在縣東五十里舊經云越王採  
錫於此

橫山 嘉泰會稽志在縣東三十四里

銀山 萬曆會稽縣志在縣東五十里

東化山 會稽縣志一名將軍山

西化山 萬歷會稽縣志一名筆峰與東化山接在

雲門山

諸葛山 萬歷會稽縣志在府城東南六十里葛洪  
常棲於此亦名葛巖

銅牛山 嘉泰會稽志在縣東南五十八里水經注

山有銅穴三十許丈穴中有大樹神廟山上有冶  
官山北湖下有練塘里吳越春秋云句踐鍊冶銅

錫之處

輿地紀勝昔銅牛見於靈記橋人逐之奔入此山掘地得銅屑云

舜山

雲門志略在府城東南四十里一名筆架山

山高可十里餘上有水田可稻縑黃之流往往茅

茨其上

壕山

嘉泰會稽志在縣東七十里漢駱夫人學道

於此昇仙有石室石井丹竈存焉

稱山

嘉泰會稽志在縣東北六十里舊經越王稱

炭鑄劍於此俗呼稱心山

方干稱心中島詩水木深不極似將星漢連中

州惟此地上界別無天雪折停猿樹花  
藏浴鶴泉師為終老意日日復年年

稷山 寶慶會稽縣志在縣東五十三里稱山南舊  
經名穢山越王種菜於此後漢謝夷吾為穢鄉嗇  
夫卽此越絕云句踐齋戒壇也亦曰齋臺山十道  
志一名棕山

白塔山 萬歷會稽縣志在府城東五十里

犬亭山 嘉泰會稽志在縣東南三十里舊經越絕  
並云句踐畜犬獵南山白鹿卽此會稽縣志歲久

相延呼為狗山又曰吼山俗謂宋攢陵所在衆山

皆拱此山獨否故名之曰吼取呼而相向義也萬

厯會稽縣志山北岸有小山曰曹家山舊為工人

伐石玲瓏若戶牖歲久蘿木蔓之積水成潭移舟

其中一洞天妙景也

施閏章家長也太守招遊曹山及吼山詩石斷忽成溪懸

厓陰復低登亭迷上下游艇失東西絕壁魚龍氣危藤鶴鶴棲使君幽興極板畫白雲梯

覆斗山 呂祖謙入越記楓江南岸有覆斗山山形

正方若斗覆



太平山 嘉泰會稽志在縣東南七十八里晉謝敷

隱居山中十餘年以母老還若耶

孫綽太平山銘  
菟我太平峻踰

華霍秀嶺樊蘊奇峯挺萼上千翠霞下籠丹壑有  
士冥游默往寄托肅形枯林映心幽漠亦既觀止

渙焉融滯懸棟翠微飛宇雲際重巒巉岨迴溪  
縈帶被以青松灑以素籟流風佇芳翔雲傍靄

謹按太平山有三一在會稽一在餘姚一在上虞  
上虞之山一名傘山惟餘姚之山最著謝敷所隱  
屬會稽或上虞未詳  
今繫於此從舊志也

陶宴嶺 會稽縣志在縣東南四十里舊經云陶弘

景隱於此山

林景熙陶宴嶺詩笑拂青蘿問隱君  
千巖秋色此中分當時宴坐無人識

唯有松風  
共白雲

日鑄嶺

嘉泰會稽志在縣東南五十五里昔歐冶

子鑄五劍采金銅之精於山下

歸田錄草茶盛於  
兩浙兩浙之品日

鑄第

一

茅峴

輿地紀勝在縣東一十八里茅君隱於此一

名玉笥出美玉山之陽曰香爐峰

石傘峰

明一統志卽會稽山之別峰下有范蠡養

魚池

方干島 於越新編在會稽山東北俗呼寒山唐方  
干別墅在鑑湖中故曰島

葛仙巖 陽明洞天圖經禹穴有石巖高丈餘南面  
側平如削真誥云此石於赤烏二年天降從安息  
國飛來上有索痕三條名為飛來石晉葛仙翁曾  
築壇煉丹後人名葛仙巖煉丹井

陽明洞 嘉泰會稽志在宛委山龍瑞宮舊經三十  
六洞天之一洞也一名極元太元之天洞外飛

來石下為禹穴傳云禹藏書處史記太史公自叙  
上會稽探禹穴注云禹至會稽因葬焉上有孔穴  
水經云山東有硯深不見底東游者多探其穴今

不可考

呂祖謙入越記龍瑞宮傍即禹穴乃大石  
中斷成蹕殊不古殆非司馬子長所探也

輟耕錄陽明洞天在秦望山後禹廟之西南諸峯  
環繞盤鬱空曲中有東嶽行祠及老子宮戴表元  
遊陽明洞天呈王理得諸君詩禹穴蒼茫不可探  
人傳靈笈鎖烟嵐初晴鶴點青邊嶂欲雨龍移黑  
處潭北斗齋壇天寂寂東風仙洞草絳絳堪憐尹  
叟非關吏猶向江南逐老聃韡性陽明洞詩洞天  
深窅行客疑颺輪碧簡誰能稽倚松長嘯巖壑動  
故懷未必令人非石氣盤空散成霧檜子無風落

青雨草間欲問苗龍  
壇薜荔鱗鱗絡銅虎

東小江 萬曆紹興府志在府城東南九十里亦名

小舜江西為會稽東為上虞其源出浦陽江東北

流入曹娥江

皇甫冉東小江懷靈一上人詩江上年年春早津頭日日人行借問山陰

遠近猶聞薄暮鐘聲陸羽會稽東小江詩月色寒潮入剡溪青猿叫斷綠林西昔人已逐東流去空

見年年  
江草齊

曹娥江 嘉泰會稽志在縣東南七十里江因娥得

名也名勝志源自剡溪來東折而北至曹娥廟前

名曹娥江又北至龍山下名舜江又西北折入於

海

韓性曹娥江詩隔岸檣竿著暮鴉待舟人立渡頭沙數拳頑石生雲氣一片斜陽有浪花

若耶溪 明一統志在府城南二十里與鏡湖合西

施採蓮歐冶鑄劍於此吳越春秋若耶之溪深而

莫測後漢劉寵為會稽太守若耶父老人齎百錢

相送因名劉寵溪會稽縣志唐徐季海常遊嘆曰

曾子不居勝母之里吾豈遊若耶之溪遂改為五

雲溪

者舊續聞去鏡湖二十餘里乃一小澗水溪旁人烟極蕭條但有雲門寺猶存宋之問游

禹穴回出若耶溪詩禹穴今朝到耶溪此路通著  
書聞太史煉藥有仙翁鶴往籠猶挂龍飛劍已空  
石帆拄海上天鏡落湖中水底寒雲白山邊墜葉  
紅歸舟何慮晚日暮使樵風孟浩然耶溪泛舟詩  
落影餘清輝輕橈弄烟渚澄明愛水物臨汎何容  
與白首垂釣翁新粧浣紗女相看似相識脈脈不  
得語蒸母潛春汎耶溪詩幽意無斷絕此去隨所  
偶好風吹行舟花落入溪口際夜轉西壑隔山望  
南斗潭烟飛溶溶林月低向後生事且瀟漫願伴  
持竿叟崔浩汎若耶溪詩輕舟去何疾已到雲林  
境起坐雲鳥間動搖山水影巖中響自答  
溪裏言彌靜事事令人幽停橈向餘景

鯉浦 萬厯紹興府志在府城東北四十里

樵風涇 萬厯會稽縣志在縣東南二十五里孔靈

符會稽記云射的山白鶴常為仙人取箭漢鄭弘  
少時採薪得一遺箭頃之有人覓箭問弘何所欲  
弘識其神人也答曰常患若耶溪載薪為難願朝  
南風暮北風後果然世號樵風涇

炭瀆 水經注吳越春秋云練塘句踐鍊冶銅錫之  
處采炭於南山故其間有炭瀆句踐臣吳王封句  
踐於越百里之地東至炭瀆是也

平水 嘉泰會稽志在縣東南三十五里鏡湖所受



三十六源之水平水其一也

劉基游平水記赤莖山南行六七里泊於

雲峯之下曰平水市卽唐元微之所謂草市也其地居鏡湖上游羣小水至此入湖陸游平水小憩詩蓐食古菴中肩輿出市東霧收山淡碧雲漏曰微紅酒旆村塲近督船浦湊通平生喜行路小住

莫匆匆

御河 於越新編在府城東南十五里自董家堰抵寶山宋攢宮河也

麻潭 水經注下注若耶溪水至清照衆山倒影窺之如畫

日月池 輿地紀勝在縣治東北一里池二所俗傳  
錢武肅王有目疾故浚此二池

南池 明一統志在縣南二十五里相傳范蠡養魚  
處

鄭公泉 水經注寒溪之北有鄭公泉泉方數丈冬

溫夏涼漢太尉鄭弘宿居潭側因以名泉嘉泰會

稽志輿地志云弘雖居台輔嘗思故國曾病困思

得此泉水家人馳取飲少許便差

華鎮鄭公泉詩  
溪上清泉玉色

寒臨泉踏盡石苔斑為憐北  
闕乘軒客白首高情在舊山

菲飲泉 明一統志在府東南十二里大禹寺西

真珠泉 萬曆紹興府志在少微山齊祖之家山十  
詠泉其一也

苦竹泉 明一統志在秦望山側林多苦竹泉出其  
下故名

禹井 明一統志在會稽山水經注云山南有礪去  
廟五里謂之禹井

葛仙井 明一統志在禹穴側葛洪煉丹於此

海 嘉泰會稽志在縣北二十里

蕭山縣

蕭山 名勝志在縣西一里舊志晉許詢於此憑林

築室有蕭然自適之趣考漢書地理志餘暨縣蕭

山潘水所出東入海則名不始於詢

劉滄蕭山詩  
一望江城思

有餘遙分野經入樵漁青山經雨菊花盡白鳥下  
灘蘆葉疎靜聽潮聲寒木杪遠看風色暮帆舒秋  
期又踐澗間路不

及年年向此居

菊山 於越新編在縣西二里

茗山 嘉泰會稽志在縣西三里王十朋會稽風俗

賦茗山鬪好

北幹山 嘉泰會稽志在縣北一里晉許詢家於此

山之陽

去虎山 嘉泰會稽志在縣北五里山有猛虎嘗傷人一夕負子渡江西去縣令杜守一因名其山時

景德四年六月晦也

城山 名勝志在縣西九里其山中卑四高宛如城  
堞吳伐越次查浦越立城以守查此山即其地名  
越王城山半有池曰洗馬泉中產嘉魚越拒吳時  
吳意越必乏水以鹽魚為餽越取雙魚答之遂解

園

定山 萬厯紹興府志在縣西一十二里

石巖山 名勝志在縣西南十二里巉岉壘危狀如  
獅子巔有香泉方四尺深尺許

荏山 嘉泰會稽志在縣東北十里舊經云越王種

荏於此

塔山

一名南山

萬曆紹興府志在縣南二十五里縣學

向之有文筆峰絕頂舊有塔其南坳如舟名石船塢

三臺山

嘉泰會稽志在縣南五十里

摩烏山

紹興府志在縣西南十五里東方朔神異

記亞父斷蕭山南嶺將摩於烏江蓋江東以擲為

摩云

冠山 名勝志縣西十七里山形如冠有泉甘冽

連山 名勝志在縣西二十里長岡九里舊經秦始

皇欲置石橋渡浙江今石柱數十列於江際旁有

小山號石井山其井上廣下曲相傳為妃子墓

獅子山 萬歷紹興府志在縣西二十三里浙江正

當其面

石牛山 萬歷紹興府志在縣西南八十里其東之



徑抵富陽縣界

大山 名勝志在縣西南九十里橫亘三都一名長山其南之最高者曰鏡臺山一名白石山許詢修煉之所巖曰元度巖洞曰仙人洞草木皆香可以療疾又曰百藥山

龍門山 紹興府志在州口山北十里兩山對峙上有龍湫

翠嶂山 嘉泰會稽志在縣西二十五里一名夏駕

山

佳山 萬厯紹興府志在縣南九十里

尖山 萬厯紹興府志在縣南五十里桃源鄉

金雞影山 一名峽山 嘉泰會稽志在縣南六十里八面

向江有雞籠石

苧蘿山 嘉泰會稽志在縣南三十里有西施廟一

在諸暨 輿地廣紀西子出蕭山縣毛竒齡蕭山縣志刊誤山有西施宅宅前有紅粉石西施

屬諸暨本之十道圖經吾謂施斷屬蕭不屬諸者考後漢書郡國志於會稽郡餘暨縣下云越絕書

曰蕭山西施之所出  
此亦信史之一端也

涉皇山 後漢書郡國志注謝承書有涉皇山

臨江山 嘉泰會稽志在縣東南二十里舊牛頭山  
天寶中改此名太平寰宇記臨江山在縣東南水  
陸並行二十里其山北江水迴流舟行信宿猶經  
萬渚說云牛頭苧蘿一日三過

黃竹山 晏公類要在縣東三十三里越絕書云范  
蠡遺鞭於此生筍為竹色皆黃

螺山

嘉泰會稽志在縣東二十里形似螺故名

洛思山

太平御覽永興縣東五十里有洛思山漢

太尉朱儁為光祿大夫時遭母喪欲卜地此上將

歸洛下冢師相地云去鄉既遠歸思常深忽極目

千里北望京洛遂縈咽而死葬山頂故名

徐天祐  
洛思山

詩歸去踈蹤歲月深  
羈愁無奈故鄉心  
人生畢竟俱懷土  
莊舄當年自越吟

鳳凰山

萬歷紹興府志在縣東三十里又名慈孤

山石崖之間有望夫石

吹樓山 嘉泰會稽志在縣東四十里一名姑帝山

航塢山 名勝志在縣東四十里舊經云句踐之航

也山巔有湫曰白龍井

陸都拉航塢山詩拂衣登絕頂石磴清苔紋鳥道懸

青壁龍池浸白雲樹深猿抱子花暖鹿成羣更愛禪房宿泉聲徹夜聞

龕山 紹興府志在縣東五十里其形如龕相傳為

錢武肅屯兵之所明時官兵於此破倭寇馬一巨

石有馬蹄迹名馬蹄石

朱純登龕山詩長江隈吳越形勢一何雄島嶼蒼茫

外乾坤浩蕩中江連埋日霧汀暗走沙風忽起乘槎興滄洲不可窮徐渭丙辰八月十七日與肖甫

侍師季長沙公間龜山戰地遂登岡背觀潮詩白  
日午未傾野火燒青昊蠅母識殘腥寒蜃聚秋草  
海門不可測練氣白於擣望之遠若遲忽馬過如  
掃陰風噫大塊冷艷攔長島怪沫一何繁水與水  
相漂玩弄狎鬼神去來準昏  
曉何地無恢奇焉能盡搜討

鼈子山

蕭山縣志在縣東北三十五里在海中與

海寧縣赭山對峙又云鼈子門

壕嶺

舊浙江通志在縣南六十五里諸暨縣界

浙江

蕭山縣志在縣西十里其源自南直徽州黟

縣來經富陽入縣境北轉海寧入於海

詳見錢塘縣劉孝綽

遂渡浙江詩秋季弦望後輕寒朝夕殊商人泣絢  
扇客子夢羅襦憂來自難遣况復阻川隅日暮愁  
陰合繞樹噪寒鳥濛濛江烟上蒼茫沙嶼無解纜  
辭東越接軸鴛西徂懸帆似馳騏飛棹若驚鳧言  
歸游俠窟才從冠蓋衝盧綸波浙江詩前船後船  
來相及五兩頭平北風急飛沙捲地日色昏一半  
征帆浪  
花濕

浦陽江 嘉泰會稽志在縣東源出浦江北流入諸  
暨縣溪又東北流由峽山直入臨浦灣以至海俗

名西小江一名錢清江

蕭山縣志刊誤三江尚書  
孔傳周禮賈疏爾雅郭注

皆誤吳都賦注以為松江婁江東江尤謬吳地無  
東江且史記正義但云婁江入海已耳未聞有三

也國語曰吳之與越三江環之又曰與我爭三江之利者非吳耶夫松婁焉能環越且松婁本吳地豈可曰吳與我爭三江之利惟國語韋昭注曰三江者松江浙江浦陽江也此說最當今西小江則浦陽經流錢清江則浦陽尾閘也故蕭山西小江入錢清江處有三江口

湘湖 於越新編在縣西二里本民田低窪受浸宋時居民奏乞為湖政和年楊龜山來知縣事遂成

之嘉泰會稽志周八十里生蓴絲甚美

錢宰湘陰草堂記蕭

山湘湖山秀而疏水澄而深邑人謂境之勝若蕭湘然因以名之

漁浦 明一統志在縣西三十里

丘近旦發漁浦潭詩漁潭霧未開赤



亭風已颺棹歌發中流鳴鞞響沓嶂村童忽相聚  
野老時一望詭怪石異象嶄絕峯殊狀森森荒樹  
齊斫寒沙漲藤垂島易陟崖傾嶼難傍信是永  
幽棲豈徒暫清曠坐嘯昔有委卧治今可尚陶翰  
乘潮至漁浦詩艤棹早乘潮潮來如風雨嶂高忽  
已屆峰暗莫及睹軒騰心為失浩蕩目無主風停  
浪始開漾漾入漁浦雲景共澄鮮江山相吞吐偉  
哉造化靈此事從終古流沫誠足誠高歌調易苦  
頗因忠信全  
客心猶栩栩

臨浦 舊浙江通志在縣南三十里即浦陽江水所  
經

潘井 嘉泰會稽志在縣西南七里漢書地理志注

云蕭山潘水所出意水源或出於此

諸暨縣

長山 名勝志一名陶朱山縣西一里北有戚家嶺  
亦曰七岡以范蠡居山之南有范蠡巖下有鴟夷  
井

櫛山 嘉泰會稽志在縣西一十八里一名諸山

亭蘿山 太平御覽諸暨縣北界有蘿山越西施鄭

旦所居所在有方石是西施曬紗處今名亭蘿山

陶朱新鉢蕭山諸暨之間有東施西施二村西子  
生於西村李白送祝八之江東賦得浣紗石詩西  
施越溪女明艷光雲海未入吳王宮殿時浣紗古  
石今猶在桃李新開映古查菖蒲猶短出平沙昔  
時紅粉照流水今日青苔覆落花君去西秦適東  
越碧山青江幾起忽若到天涯思故人浣紗石上  
看明月曾畹苧蘿山詩出郭尋芳草湖田近水濱  
居然浣紗石曾共浴吳人苔上蛾眉月溪流舞袖  
春至今山下路  
猶帶綺羅塵

漁櫓山 諸暨縣志在縣北二十五里縣之坐山

巖崖山 嘉泰會稽志在縣北五十里

大巖山 嘉泰會稽志在縣北五十里

五洩山 水經注諸暨縣洩溪中道有兩高山夾溪

造雲壁立凡有三洩洩懸三十餘丈廣十丈中二

洩不可得至登山遠望乃得見之下洩懸百餘丈

水勢高急聲震水外上洩懸二百餘丈望若雲垂

此是瀑布土人號為洩也舊浙江通志縣西五十

里輿地志山峻而有五級故以為名刁約謂之小

雁蕩

刁約五洩山詩西源窮盡到東源直注層崖五磴泉真境無由追汗漫勝遊聊得弄潺湲

風生虎嘯層巖底月上猿啼古木巔只待歸來林下去來同靈默此安禪吳萊次韻柳博士五洩山

紀游詩曰曉行呼野鶴羣溪山五級洗嵐氛虹霓  
射壁從空現霹靂搜潭到地聞桑苧茶鑄遺凍雪  
偃佺藥杵落晴雲飄然早已同仙術老我曾探嶽  
瀆文周鏞諸暨五洩山詩路入蒼烟九過溪九穿  
巖曲到招提天分五溜寒傾北地秀諸峯翠揮西  
鑿徑破崖來木杪駕船鳴竹落椽題當年老默無  
消息猶有祠堂一枝藜徐渭五洩詩二首紫閭村  
中一線微穿厨入竈浣裙衣無端流出高巖上解  
與游人作雪飛轟雷千尺破銀河鐵障陰寒  
夏轉多戎已看來無此景大龍湫比比如何

衡山 嘉泰會稽志在縣西南二十里

五指山 弘治紹興府志在縣南六十五里山形如

指故名

石鼓山

紹興府志在縣南五十里山下有盤石如

鼓扣之有聲多產黃精白朮竹箭相傳唐王鍊師  
居其中

八柱山

舊浙江通志在縣西南七十里浦江縣界

水發柱南者為南源發柱西者為西源

浮塘山

名勝志在縣南二十五里山巔有塘雲覆

其上俗呼為浮塘亦呼茅塘

句垂山

嘉泰會稽志在縣南五十里國語越臣於

吳吳更封越南至句乘即此

金澗山 萬厯紹興府志在縣南六十里下有坑相傳有金宋元間命官淘采間得之如糠粃然知州馮翼上其事罷之

柯公山 萬厯紹興府志在縣東北五十里

九江山 嘉泰會稽志在縣北二十五里石室幽邃

四壁刻石為女人號靈女諸暨縣志亦曰仙姑山  
金雞山 名勝志與苧蘿山相對越絕書雞山豕山

句踐以畜雞豕者俗訛雞山為金雞

宣家山 紹興府志在縣東七十里嶮縣界

五岫山 萬厯紹興府志在縣東六十里峰巒秀出者五與會稽雲門相連

東白山 嘉泰會稽志在縣東九十里一名大白峰連跨三邑其在剡曰西白在東陽曰北白

烏帶山 太平御覽在縣西北其上多紫石居士謝敷少時經始諸山往往遷易功費千計生業將盡



後夢山神語之曰當以五十萬相助覺甚怪之曰  
見主人牀下有異色甚明試取拭視乃紫石因問  
所從來云出此山遂往掘果得其利不貲諸暨縣  
志舊名烏笏山亦名采仙山

杭烏山 嘉泰會稽志在縣北七十五里疊嶂七十  
有二傍有杭烏刺史廟一峰特高風雨晦冥時常  
聞樂聲號鼓吹峰

寶掌山 名勝志在縣東南四十五里一名千歲巖

唐貞觀中寶掌禪師開巖於此自云年已千歲真  
身在半巖去地四十九尺山巖中石室可容百餘  
人洞口石壁數片如削禪師種貝多木一株在巖  
上時有頻伽鳥巢其上

金鵝山 輿地紀勝在縣南五十里舊經云有金鵝  
自此山飛入吳郡

雞冠山 輿地紀勝在縣西五十里山形如雞冠出  
奇石其紋若星月花獸上有玉女冢

懋林山 太平寰宇記謝靈運作山居賦於此山

鐵崖嶺 名勝志在縣東二十里崖石如鐵峻立高

百丈上有綠萼梅百本又有龍湫山之陰一小山

泉出其下可照鬚髮

白水嶺 萬厯紹興府志在縣東南八十里東陽縣

界

陽塘嶺 萬厯紹興府志在縣西五十里浦江縣界

斗子巖 名勝志在縣南四十里形高如斗峻不可

上

玉京洞

於越新編在洞巖山其洞十數重深十餘

里必秉火以入入必以物記其處洞門相似者多

不則迷出路矣或云深處行二三日可抵錢塘江

仙巖洞

嘉泰會稽志在五洩山

劉述仙巖洞詩英  
英洞口山觸石纒

一縷瀆史徧空

山沛然作霖雨

浣江

嘉泰會稽志在縣南一里又曰浣渚俗傳西

子浣紗之川

泌浦湖 舊浙江通志在縣東北五十里周圍八十

餘里

槩浦 嘉泰會稽志在縣北十九里吳王闔閭弟之子夫槩所封因以為名

山遐浦 嘉泰會稽志在縣東八十里舊經云山遐斷高公湖為浦取漁所集千艘後人思之號山遐浦按遐字彥林建元初為餘姚長後至東陽太守出晉書本傳

干溪 名勝志在縣東北六十里吳干吉所居俗以  
溪水常涸因訛為乾溪

海 舊浙江通志縣去海二十里

餘姚縣

秘圖山 嘉泰會稽志在縣北六十七步上有石匱  
夏禹藏靈秘圖之所初名方丈山唐天寶六年改

今名

明一統志秘圖山元劉  
仁本於此作續蘭亭會

龍泉山 名勝志在縣城中秘圖山西一里許山腰

有微泉不竭所謂龍泉也舊名靈緒山亦名嶼山

方千龍泉絕頂詩未明先見海底曰良久遠難方  
報晨古樹含風常帶雨寒巖四月始知春中天氣  
爽星河近下界時豐雷雨均前後登臨思無盡年  
年改換往來人謝遷龍泉山詩迤邐蟠龍接秘圖  
雨中臺殿畫糝糊神仙勝境餘三島狂客歸舟任  
五湖地近東溟先見日樹連南郭晚棲烏高軒過  
處人爭訝一片清冰照玉壺王守仁龍泉山詩我  
愛龍泉山山僧頗踈野盡日坐井欄有時臥松下  
一夕別山雲三年走車馬  
媿殺巖下泉朝夕自清瀉

大黃山 紹興府志在縣東二里亦名鳳山

竹山 紹興府志在縣東南五里形如龜其北趾跋

於江是為縣水口

白山 萬曆紹興府志在縣東南三里亦名蛇山

西石頭山 嘉泰會稽志在縣西三里

童山 嘉泰會稽志在縣西三里

馬渚山 餘姚縣志在縣西三十里相傳云秦皇飲

馬於此

吳女山 嘉泰會稽志在縣西三十八里舊名蛾眉

山天寶六年改今名



豐山 萬曆紹興府志在縣西北五里東西二峰相峙俗呼東豐山西豐山

勝歸山 萬曆紹興府志在縣北三里相傳晉劉牢之勝孫恩歸屯此故名

烈山 餘姚縣志在治東五里

化安山 舊浙江通志在縣東南二十里有雙瀑數十丈泉曰化安泉在明黃忠端公墓側

黃箭山 舊浙江通志在縣東南十八里有龍洞三

禱雨輒應

九壘山 紹興府志在縣東九里又名九里山

大小雷山 嘉靖餘姚縣志去治南二十里神仙所  
宅獵者汗觸之輒震雷

羅壁山 明一統志在縣南十八里有漢虞國墅襟  
帶溪山巖谷大勢具體金谷晉郝愔為會稽內史

因卜居焉 華鎮羅壁山詩山列翠屏圍碧落溪流  
鳴玉繞平田郝家池館雖燕沒金谷形

容自  
宛然

白水山 名勝志為西四明在縣西南六十里山壁  
峭立有泉四十二道投空而下是曰白水白水宮  
在其下

太平山 於越新編在縣南八十里山形似織四角  
各生一種木一檫一梓一櫛一榘藝文類聚餘姚  
江源出太平山東至浹江口入於海

四明山 名勝志在縣南一百十里

詳見寧波府鄞縣

高一

萬八千丈周圍二百十里蟠跨數縣由鄞小溪而

入者曰東四明由餘姚而入者曰西四明由奉化  
雪竇而入者直曰四明在餘姚境者由白水向東  
南行二十餘里其中為三朶峰少南則芙蓉五峰  
相望各五六里其中峰有漢隸深刻四大字曰四  
明山心其上為寒嵐巖東南十里為殺羊巖又南  
為分水嶺界於鄞縣寒嵐巖之右為石窗四面玲  
瓏每天地澄霽望之如牖戶中通日月之光亦名  
四窗是稱四明石窗

施肩吾與諸隱者夜登四明  
山詩半夜尋幽上四明手攀

松桂觸雲行相呼已到無人境何處玉簫吹一聲  
施肩吾宿四明山詩黎洲老人命余宿杳然高頂  
浮雲平下視不知幾千  
勿欲曉不曉天雞鳴

大蘭山 嘉泰會稽志在縣南八十里相傳漢劉綱  
夫婦於此仙去

烏膽山 嘉泰會稽志在縣西南四十里

靈源山 嘉泰會稽志在縣西南三十里有泉曰靈

源故名

東明山 嘉泰會稽志在縣西南五十里

塢山 名勝志在縣西南十二里舊經云支道林居  
剡每遠來塢山或問之答曰謝安石昔來見就輒  
移旬日今舉目觸情不覺欣賞後病甚遂移來塢

中

姜山 萬歷紹興府志在縣西五十里其袤十里下  
有姜女泉

蕨山 嘉靖餘姚縣志在治西北十四里

點兵山 萬歷紹興府志在縣西北十二里晉高雅

之討孫恩於此點真焉今呼為點碧

石姥山 萬歷紹興府志在縣西北十五里有白龍  
湫禱雨輒應

禾山 名勝志在縣西北二十里謝靈運云山海經  
有浮玉山北望具區今餘姚烏道北禾山與具區  
相望即浮玉也

鑊劍山 嘉泰會稽志在縣西北四十里

眉山 弘治紹興府志在縣北三十七里

歷山 方輿勝覽在縣東八十里按歷山鄭康成云

在河南今越有歷山象田舜井蓋餘姚舜餘族所

封子孫思舜之鄉取象於此

蘇鶚演義歷山有四一河中二齊州三冀

州四濮州要當以河中為是江淹題歷山詩愁生白露日思起秋風年落葉下楚水別鶴淥吳田嶂氣陰不極日色虧半天酒至情蕭瑟憑尊遠惘然

姚丘山 弘治紹興府志在縣西北六十里舜餘族

所封

冶山 嘉泰會稽志在縣東北二里傳云歐冶子鑄



劍之所

安山 嘉泰會稽志在縣東北十里

烏戎山 萬曆紹興府志在縣東北十七里

流亭山 嘉靖餘姚縣志在縣東北二十里下為石

堰

陳山 名勝志在縣東北十里遠望山形卓峭如筆  
至其巔則正平本嚴光故里有墓在焉亦名客星

山

梅梁山 萬曆紹興府志在石匱山南二里梅溪水

自其西出

石屋山 萬曆紹興府志在縣東北二十三里空洞

如屋

彭山 嘉靖餘姚縣志在縣東北二十八里

孤山 於越新編在縣東北二十八里四峯如筆格

最秀前有墩曰漲沙墩浮出湖中雖大水溢不沒

匡山 弘治紹興府志在縣東北四十里一名康山

石匱山 名勝志在燭溪湖中三面皆水自高山望之正方如匱

屯山 弘治紹興府志在縣東北十五里

航渡山 嘉靖餘姚縣志在縣東北二十二里

虞山 嘉泰會稽志在縣西三十里

許山 弘治紹興府志在縣東北三十八里三山所城跨山脊

埋馬山 於越新編在縣東北三十五里舊有石臥

水如馬或云宋高宗為金所逐徒步行中途忽得馬疾馳向明州至此馬化為石

蔡山 金山 破山 名勝志三山相峙如鼎足因

名鼎峰俱在縣東北三十五里

懸泥山 嘉泰會稽志在縣北六十里孤峙海中

仙居山 於越新編在縣東北六十里狀類栲栳亦

曰栲栳峰

瀑布嶺 茶經越州餘姚茶生瀑布嶺者號曰仙茗

大者殊異小者與襄州同

桃花嶺 明一統志在縣南二十里下有蜜桃樹約

數圍

梅嶺 弘治紹興府志在縣東三十五里

九曲嶺 分水嶺 舊浙江通志俱在縣南八十里

大蘭山東

清賢嶺 舊浙江通志在縣西南三十里塢山南晉

謝安支遁許詢數往來焉

吳山洞

嘉泰會稽志在縣東北洞面滄海巨浪激

撞巖石嵌空

嚴陵塢

萬曆紹興府志在客星山下十道志嚴子

陵避光武聘處

姚江

名勝志在縣南十步許又名舜江

僧曇瑩姚江詩沙尾

鱗鱗水退潮柳行出沒見漁樵客  
船自載鐘聲去落日殘僧立寺橋

菁江

嘉泰會稽志在縣西十五里源出四明山北

流滙餘姚江以達菁江

秘圖湖

弘治紹興府志因秘圖山而名今為縣治

燭溪湖

名勝志在縣東北十八里舊經云昔人迷

失道忽有二人執燭夾溪而行乃因得路故名

梅澳湖

嘉泰會稽志在縣東北一十八里東即燭

溪湖此其澳曲也

郝家池

舊浙江通志在羅壁山晉郝愔池也

雁池

明一統志在縣南雙雁鄉輿地志云有漢虞

國宅國為日南太守愛民及物出則雙雁隨軒秩

滿還家雁與俱至其卒也棲於墓不去後人名其水曰雁池

龍泉 舊浙江通志在龍泉山趾宋高宗飲之甘因取十甕以去

海 舊浙江通志縣去海四十里

上虞縣

五癸山 弘治紹興府志在縣北十里

昇相山 嘉泰會稽志在縣南三十五里



上申山 嘉泰會稽志在縣南四十里

釣臺山 名勝志在縣東南五里許下瞰深潭云葛

洪釣處縣西南七里許西溪湖之陰亦有釣臺其  
山有木槎大十圍陶隱居常乘之垂釣既去槎墜  
於潭底遂不復浮

蔡墓山 名勝志在縣西十二里蔡邕卒葬此攷本  
傳邕嘗亡命會稽其墓則非也

羅巖山 萬厯上虞縣志在縣東七里丹崖翠壑確

冠衆山 山半石上鐫羅巖二篆字

蘭芎山

一名蘭風山

水經注縣南有蘭風山山有三嶺

枕帶長江岿堯孤危望之若傾緣山之路下臨大川皆作飛閣闌干乘之而渡謂此三嶺為三石頭丹陽葛洪遁世居之基井存焉琅邪王方平性好山水又愛宅蘭風垂釣於此

佛跡山

名勝志在縣西北四十五里有石如巨人

足跡

龍頭山 名勝志在縣西北三十里西瞰曹娥江太平御覽上虞縣有龍頭山上有蘭峰峰頂盤石廣丈餘葛洪學仙坐其上

銅山 弘治紹興府志在縣西南二十五里

象田山 嘉泰會稽志在縣西南四十里周四餘里南有舜井

豪山 於越新編在縣西南四十二里高數百仞銳如卓筆漢東陽駱夫人於此上昇有石井丹竈

指石山 嘉泰會稽志在縣西南五十里

東山 嘉泰會稽志在縣西南四十五里晉太傅謝

安所居也其巔有謝公調馬路白雲明月二堂遺

址又西一里始寧園乃謝靈運別墅一曰西莊山

西有太傅墓山半有洗屐池東西二眺亭舊經云

梁徵士魏道微修道得仙於謝安山南史杜京產

與顧歡開舍授學於東山下今有杜浦顧墅

韻語  
陽秋

會稽臨安金陵皆有東山俱傳以為謝安攜妓之所安本傳初居會稽與王羲之許詢支遁游處被

名不至遂棲遲東山此會稽之東山也本傳又云  
安石常住臨安山中坐石室臨峻谷悠然歎曰此  
與伯夷何遠今餘杭有東山蘓子瞻有游餘杭東  
西巖詩注云即謝安東山此臨安之東山也本傳  
又謂及登台輔於土山營墅棲館林竹甚盛每攜  
中外子姪游集今土山在上元縣建康事跡云安  
石於此擬會稽之東山亦號東山此金陵之東山  
也胡曾東山詩五馬南浮一化龍謝安入相此山  
空不知攜妓重來日幾樹鶯啼谷口風僧法具東  
山詩窻中速看眉黛綠盡是當年歌吹愁鳥語夕  
陽人不見薔薇花暗小紅流韓性來山詩遠山倚  
空青濛濛剡溪白匝來天東天機不卷芳草碧中  
有行地雙蟠龍杖藜欲出人間世俯仰明河在平  
地長松忽動鶴飛來萬里剛風起衣袂薔薇開落  
春復秋洗屐何人繼清遊凭欄一  
笑衆山小遙指雲氣看齊州

含珠山 上虞縣志在縣西南五十里

雙碁山 嘉泰會稽志在縣西南五十里俗傳仙人

對奕於此

鳳凰山 嘉泰會稽志在縣西南六十里山有鳳穴

壇讌山 嘉泰會稽志在縣西南五十里水經注嶂

山之成工嶠西有孤峰特上飛禽罕至常有采藥

者沿山見通溪尋上於山頂樹下有十二方石地

甚光潔還復更尋遂迷前路言諸仙之所醮讌故

以壇讌名山太平寰宇記即謝靈運遊宴之處今  
往往聞有簫笛之聲也

覆卮山 明一統志在縣南五十里與太平山相連  
宋謝靈運常登此山飲罷覆卮山上今存一石竅  
大旱不涸呼為龍眠窟

金壘山 萬厯上虞縣志在縣西南二里漢魏伯陽  
著參同契於此旁有丹井晉太康中浚井得金壘

故名

鳳鳴山

萬歷上虞縣志在縣東南十餘里昔有仙

女跨鳳至山後土人立祠祀之號靈惠真人左有

洞曰鳳鳴山飛泉噴瀑若冰柱水簾不可名狀

長者山

嘉泰會稽志在縣南二里萬歷上虞縣志

宋周元吉居甯賑突不烟者鄉人德之遂以名山

四明山

嘉泰會稽志在縣南四十里

詳鄞縣  
餘姚

握登山

於越新編在縣西南四十里聖母廟下有

虹樣村東西赤岸傍虹樣山舊志謂握登生舜之



地者妄也

百樓山 於越新編在縣南十里高五里與縣相對  
太平寰宇記郡國志云石壁山南對小山山形方正如樓

馬目山 水經注曹娥江濱有馬目山洪濤一上波  
隱是山勢淪崦亭間歷數縣行者難之

龍塘山 嘉泰會稽志在縣西南四十里一名鵝鼻  
山有上下二潭上潭泉脉不竭下潭多枯歲祭禱

於此有驗里人結屋覆之

龜山 萬曆紹興府志一在縣東十里大查湖中一在縣西二十五里曹娥江西岸

夏蓋山 於越新編在縣北六十里世傳夏禹常駐蓋焉南距夏蓋湖北障海上有龍潭南麓有淨衆寺宋張卽之書其門曰大禹峰

蓮峰山 弘治紹興府志在縣東與餘姚接境山腰有蓮峰寺

伏龍山 萬歷上虞縣志在縣北三十餘里巔有巨石橫四丈有奇世傳吳越公主墓

福祈山 弘治紹興府志在縣北四十五里

橫山 弘治紹興府志在縣北又名九峰山

西莊山 萬歷紹興府志在縣西南四十里舊志云葛仙翁常隱此有石窟如白者五中有泉不竭山下有洗藥溪水底石如丹砂

蔡山 萬歷紹興府志在縣西南五十里曹娥江西

岸下為蔡山渡

孝聞嶺 嘉泰會稽志在縣北十里昔有包全居之

以孝聞

笠竹嶺 萬曆紹興府志在縣東二十里接餘姚境

楊梅峰 於越新編在縣西南五十里上多楊梅

玉屏峰 舊浙江通志在縣東二十里狀如列屏

雙筍石 明一統志在縣西南七里石雙立各數百

尺

鳳鳴洞 輿地紀勝一名仙姑洞昔有仙女乘鸞鶴  
來下洞有飛瀑濺沫嘗若風雨

薔薇洞 明一統志在東山之半舊傳晉謝安攜妓

遊處

李白薔薇洞詩不到東山久薔薇  
幾度花白雲還自散明月落誰家

上虞江 嘉泰會稽志在縣西二十八里源出剡縣  
東北流入江分三道一出曹娥江一自龍山下出  
舜江又北流至三江口入於海

通明江 嘉泰會稽志在縣東十里源出餘姚江其

西自運河入於江

夏蓋湖

嘉泰會稽志在縣西北四十里湖內三十

六溝其岸北二斗門依山有神祠湖東北則夏蓋

山也夏蓋亦作夏駕又作夏架水經云西陵湖西

有湖城山東有夏架山湖水上承妖臯溪而下逕

浙江舊浙江通志北接大海海岸有夏蓋山湖直

其南唐長慶二年永豐上虞寧遠新興孝義五鄉

之民割已田為之周一百五里

互見水利

白馬湖 嘉泰會稽志在縣西南四十里在夏蓋湖

南水經云白馬潭深無底創湖之始邊塘屢崩百

姓以白馬祭之因名

西溪湖 舊浙江通志在縣西南門外三十六湖之

水鍾焉昔縣令戴延興築塘七里又名七里湖後

屢湮萬曆十二年旱甚知縣朱維藩復之

互見水利徐渭

復西溪湖詩復此西湖水侯即西門豹湖水何足  
論溉我三鄉稻湖上新稻熟湖中赤鯉長網魚煮

香稻千載  
薦桐鄉

五夫河

於越新編在縣東北三十五里納夏蓋白

雲上妃湖水東達餘姚西橫注於江

會稽風俗賦注上虞有地

名五夫秦皇封五大夫松處蓋流俗之傳

顧野灘

嘉泰會稽志在縣西南四十里世傳顧歡

家墅於此

飲牛溪

嘉泰會稽志在縣南五十里帛道猷巖下

石有繫牛足跡溪以此名

洗藥溪

舊浙江通志在西莊山葛仙翁常滌藥於



此水底石如碎丹砂流去復生他水皆受穢惟此  
溪澄澈纖塵亦一異也

岫浦 水經注縣下有小江源出岫山謂之岫浦浦  
西接山陰浦而達於江

白龍潭 明一統志在縣東南三十五里潭在山上  
下凡三請禱者挽樓而上僅至下潭已目眩股慄  
不可留

海 舊浙江通志縣去海六十里

新昌縣

五馬山

弘治紹興府志又名北山在縣北二里

南明山

嘉泰會稽志在縣南五里一名石城一名

隱岳初晉僧曇光栖跡於此支道林昔葬此山下

梁天監中建安王造彌勒石佛像山有寶相寺寶

慶會稽續志僧端辨云山實天台之西門也吳越

錢武肅王改曰南明

據錢惟演重  
修寶相寺碑

有隱岳巖來溪

塘仙髻峰等處

章得象南明山詩天台西面列如  
屏洞穴幽竒地竅靈百尺巖中真

像在千年澗畔古松青路傍斷石留人跡壁上題  
文缺舊名我丹丘仙郡守暫來游似覺魂清

天嶽山 嘉泰會稽志在縣西南七里

書案山

一名五山

萬曆紹興府志在縣東南二里五峰

相連如貫珠正對學宮之前儼如書案降而平行  
為縣治

獨秀山 成化新昌縣志在縣西北三里其脉自天

姥山來起復蜿蜒巍然獨峙

南巖山 嘉泰會稽志在縣西南二十里世傳任公

子釣魚之所成化新昌縣志山巖陡險皆沙石積成如築牆狀以物觸之時有墜落世傳大禹治水

東注積成此巖是為海門

李紳龍宮寺碑南巖禹迹高下猶存王十朋會

稽風俗賦南巖嵯峨禹迹古今虛天驪游南巖山詩不著烏紗只岸巾尋山遠得愛山人半空飛雨役衣潤入座晴嵐照眼新風過松杉猶蘊藉雪消巖壑更精神何時亦把任公釣坐釣日東橫海鱗

天姥山 嘉泰會稽志在縣東南五十里東接天台

華頂峰西北聯沃洲山寰宇記云登此山者或聞

天姥歌謠之響

廣博物志道經云兩火一刃可以避言剡中多名山可以避災也故

漢晉以來多隱逸之士沃洲天姥是其處宋書州  
郡志天姥山與括蒼山相連元嘉中遺名畫狀於  
團扇太平寰宇記謝靈運詩瞑投  
剡中宿明登天姥岑即此也

成化新昌縣志高

三千五百丈周回六十里道家稱為第十六福地

李白夢游天姥吟留別海客談瀛洲烟濤微茫信  
難求越人語天姥雲霓明滅或可睹天姥連天向  
天橫勢拔五嶽掩赤城天台四萬八千丈對此欲  
倒東南傾我欲因之夢吳越一夜飛渡鏡湖月湖  
月照我影送我至剡溪謝公宿處今尚在綠水蕩  
漾清猿啼脚着謝公屐身登青雲梯半壁見海日  
空中聞天雞千巖萬轉路不定迷花倚石忽已暝  
熊羆龍吟殷巖泉慄深林兮驚層巔雲青青兮欲  
雨水淡淡兮生烟列缺霹靂丘巒崩摧洞天石扇  
訇然中開青冥浩蕩不見底日月照耀金銀臺覽

為衣兮風為馬雲之君兮紛紛而來下虎鼓瑟兮  
鸞迴車仙之人兮列如麻忽魂悸以魄動恍驚起  
兮長嗟惟覺時之枕席失向來之烟霞世間行樂  
亦如此古來萬事東流水別君去兮何時還且放  
白鹿青崖間須行即騎訪名山安能  
摧眉折腰事權貴使我不得開心顏

沃洲山 嘉泰會稽志在縣東三十二里晉帛道猷

竺法深支遁皆居之戴許王謝十八人與之游號  
為勝會山有養馬坡放鶴峰皆因支遁得名洞天

福地記第十二福地沃洲山在剡縣南

歐陽修沃洲山詩沃

洲初望海攜手盡時髦小暑開鵬翼新葭長鷺濤  
目如芳草遠身比夕陽高羊祜傷風景誰云異戒

曹

鼓山 嘉泰會稽志在縣西四里山形如鼓

劉門山 嘉泰會稽志在縣東三十里相傳劉晨阮  
肇自剡採藥至此山有劉阮祠採藥徑

彩烟山 成化新昌縣志在縣南八十里與東陽縣  
界

山背山 萬曆紹興府志在縣東三十里四面相距  
四十里旁皆峻嶺嶺之外環以大溪

東岫山 嘉泰會稽志在縣東四十里晉僧法深支

遁皆隱居此世說支道林常就深公買岫山深公

曰未聞巢由買山而隱

寒雲千疊山 成化新昌縣志在縣東三十里地氣

高寒夏多挾繡揚養晦寒雲千疊山詩松竹陰森

枕松風裏歸夢不知山水長

雪溪山 名勝志在縣東八十里其地陰寒多霜雪

高五百餘丈有溪盤繞山中



渡王山 弘治紹興府志在縣東十里

朱母嶺

弘治紹興府志在縣東六十里

舊浙江通志洪武中

知縣賈驥過嶺腹甚餒出所懷乾餅啖之有父老  
自山谷中持蜜湯獻不受民乃歌曰清泉不與盜

泉同何事賢侯忍腹空從此區

區朱母嶺行人今古挹清風

黃罕嶺 嘉泰會稽志在縣北五十里唐咸通中觀

察使王式敗裘甫處

蘇木嶺 萬歷紹興府志在縣東北九十里五季時

劉萬戶董彥光破馮輔卿於此

蓮花峰 弘治紹興府志在天姥山西羣峰攢簇如

蓮花高二千五百丈

黃柏尖 成化新昌縣志俗名望海岡在縣東一百

里

穿巖 嘉泰會稽志在縣西五十里有十九峰中峰

有一圓竅東西通故曰穿巖

百丈巖 萬歷紹興府志在縣西二十里兩山壁立

上合下開中露天光一線有玉華峰瀑布泉蓋奇

境也

水簾洞

於越新編在縣東四十里大坑之中高十

丈廣三丈餘有飛瀑若垂簾然

真溪洞

嘉泰會稽志在縣東洞高四尺濶三尺深

不知其底有持炬入者風自洞出疾甚滅炬竟不  
得入

疊石

成化新昌縣志在縣東八十里三石疊起側

臨清澗下有石盤承之蓋天成非人力也

柘溪 嘉泰會稽志在縣東二十五里源出天姥山

石牛溪 嘉泰會稽志在縣西二里源出天台山瀑

布

東溪 嘉泰會稽志在縣東一里其源來自天台石

橋瀑布水支派入縣南流西

詳見水利

沃洲 嘉泰會稽志在縣東七十里晉支道林帛道

猷隱居於此

放馬澗 寶慶會稽續志在縣東三十二里沃洲山

西南支道林放馬之所

華鎮放馬澗詩春草茸茸澗水清路人猶記昔時名

金羈縱後霜蹄逸  
想見風前蹀躞聲

查浦

嘉泰會稽志在縣北水經注云東流二百餘

里與句章接界浦周六里

長潭

萬曆紹興府志在縣西南三十里一名槐潭

夫人潭

萬曆紹興府志在縣東五十里棠洲之側

石壁高峻下臨深淵過者心怖明洪武中僉事唐

方之妻死節於此因名之

杖錫潭 嘉泰會稽志在沃洲山下唐僧靈澈之故

跡

乘縣

剡山 嘉泰會稽志在縣北一里白樂天沃洲記云

東南山水越為首剡為面山巔屹起小峰號白塔

俗傳秦始皇東游使人劬此山以泄氣號剡坑山

北有戴顓墓明一統志一名鹿胎山獵士陳惠度

射鹿處

艇湖山 名勝志在縣東五里剡溪之左晉王子猷  
雪夜訪戴安道舟至此返因名

象駱山 萬曆紹興府志在縣西五里出剡山之右  
其形如駱昂首臨溪而顧縣城

簞山 名勝志在縣東三十里山勢平如鋪簞舊經  
云山有白巖龍祠碧潭其下衆流趨道湍石迅激  
石鼓山 嘉泰會稽志在縣東五十里白樂天沃洲

記云北對四明而金庭石鼓介焉名勝志世傳王

右軍池中鵝嘗飛至此山中故又名靈鵝山

動石山

嘉泰會稽志在縣東北五十里下臨溪有

石數百天欲雨石必先動

錦屏山

名勝志在縣東七十里狀如錦屏有石井

相傳以為龍窟有以物投井者後自海畔人家見之因謂與海通稱為海眼云

龜山

萬歷紹興府志在縣東七十里兩山皆如龜

狀如母子然界乎二水合流之間



三峰山 弘治紹興府志在縣東七十里

金庭山 名勝志在縣東七十里天台華頂之東門

也夏侯曾先地志云有金庭桐柏與四明天台相

連唐裴通記云剡中山水之奇麗金庭洞天為竅

其北門小香爐峰頂人莫能見之

嘉泰會稽志桐柏在天台金庭

在剡舊又以金庭為桐柏蓋其山隴聯屬故爾

洞天福地記第二十七洞

天金庭崇妙洞天三百里在越州剡縣褚伯玉沈

休文居之

花山 名勝志在縣東北三十里怪石竒松宛然圖畫下臨碧溪行舟如織漁樵歌唱遠近相應

嵎山 嘉泰會稽志在縣東三十四里水經云山下有亭帶山臨江松嶺森鬱

謹按宋書張稷為剡令至嵎亭生子名嵎字四山嵎之為字為取四山相合如乘馬乘雁之義

車騎山 嘉泰會稽志在縣東四十七里舊經云晉車騎將軍謝元為會稽內史常於此山立樓居止後人因以為名

姥山 萬歷紹興府志在縣南十五里林木蒼鬱蒼  
翠剡之南望也山外為新昌縣境

刻石山 名勝志一名獨秀山在縣南三十里十道  
志云一名穿山宋昇明末縣人倪襲祖行獵見山  
上有文凡三處苔生其上刮苔視之其大石文曰  
黃天皇蕭字道成得賢師天下太平小石文曰刻  
石者誰會稽南山李斯也唐寶元初元稹使人訪  
碑不獲王十朋會稽賦謂苔封石刻即此

遁山 名勝志在縣西南四十里下有白雲塢漢車  
騎將軍求恭隱處

亞父山 萬歷紹興府志在縣西南七十里相傳有  
採薪者遇一老人曰吾亞父也當宅此山明日見  
石間足迹甚大

貴門山 於越新編在縣西南七十里有三泉迸石

穴曰三懸潭

李易貴門卜築詩亂後亦擇居筮山  
山輒許居民百餘家喜甚手欲舞云

久聞公名此幸殆天與感茲鄭重意時節共雞黍  
剡川非沃野地僻民更窶趁時務擷茗餘力工搗

楮寡婦念遺秉汙池憐數畧我欲教耦耕盡力循  
南畝桃杏種連山深居可長處東鄰有節士酒酣  
乃發語公昔起布衣高誼掩前古親擢類平津決  
策逢真主兩宮佇六飛萬乘思一舉交親正徭強  
蠶起益傍午浩然公獨歸偶出寧  
有補默塞復何言長歎汗如雨

鹿苑山 萬曆紹興府志在縣西六十里

太白山

一作大白

名勝志在縣西七十里絕高者為太

白次為小白面東者為西白面西者為東白在東  
陽者為北白剡錄云峻極崔巍吐雲納景趙廣信  
昇仙處也石筍對立如闕瀑泉飛下孔晷記云剡

縣西七十里白石山有瀑布水巖際有窠房採窠者以葛藤連結然後能至南史褚伯玉居剡中齊高帝勅於剡西白山立太平館居之宋書褚伯玉

隱身求志居剡縣瀑布上處一樓今西北山有瀑

布泉是其處

孔稚圭太白山詩石險天貌分林交日容缺陰洞發春芽寒巖留夏雪戎

昱送清激游太白山詩卷經歸太白躡巖到蘿龕若履浮雲上須看積翠嵐倚身松入漢暝日月離

潭此境堪長往

塵中事可諳

葛現山 嘉泰會稽志在縣西北二十里

石門山 名勝志在縣西北二十五里山有石洞旁

有龍湫

五龍山 萬曆紹興府志在縣西北四十里水自真

如山來滙為龍潭者五有晉高僧帛道猷道場

予周山 嘉泰會稽志在縣西北七十里

紫巖山 弘治紹興府志在縣西北七十里

榆樹山 嘉泰會稽志在縣西北八十五里

了山

一名餘糧山

弘治紹興府志在縣北一十二里

謝巖山 弘治紹興府志在縣北三十里謝康樂所  
遊嵯縣志剡錄云山隩深峭被以榛莽有巨澗奔  
激清湍泐騰映帶左右入於溪下為三墜嶺其深  
淵迂裊紺碧一色

小白山 嘉泰會稽志在縣西六十里真誥云趙廣  
信陽城人魏末渡江來此山師李一成服氣又授  
師左君守中之道後白日升天有丹井今存

黃山 名勝志在縣南十里又名方山



嶧山 嘉泰會稽志在縣北四十里輿地志云後溪

口遡江上數十里兩岸峭壁勢極險阻乘高瞰下

有深林茂竹表裏輝映名為嶧嶮奔瀨迅湍以至

海也

水經注嶧山與嶮山接二山雖曰異縣而峰嶺相連其間傾澗懷烟泉溪引露吹畦風馨

觸岫  
延賞

東林嶺 弘治紹興府志在縣東七十里

白峰嶺 弘治紹興府志在縣西八十里八東陽縣

界

清風嶺 弘治紹興府志在縣北四十里舊名青楓

宋王烈婦死節於此因易今名

李孝先清風嶺詩山下江流本自清

山頭明月已無情此心若媿  
王貞婦莫向清風嶺上行

聖巖 萬曆紹興府志在縣北七十里高百丈長一  
里上有行路下可避風雨

馬蹄石 輿地紀勝在縣東北相傳秦皇東遊經此  
馬蹄所踐也

毛竹洞 於越新編即金庭洞洞口有竹生毛

白雲洞

萬曆紹興府志在縣東七十里與金庭山

相近風月之夕山中有聞吹笙者相傳王子晉仙  
去後主治天台華頂號白雲先生往來金庭之間  
今山下有白雲祠

石闌干

名勝志在縣西南四十五里與嵎浦相連

嵎浦

嘉泰會稽志在縣西南四十五里水經云嵎

山成工嶠以北有嵎浦

了溪

明一統志在餘糧山下越絕記禹鑿了溪人

方宅上

王十朋了溪詩禹蹟始壺口禹功  
終了溪餘糧散幽谷歸去錫立圭

剡溪

嘉泰會稽志在縣南一百五十步溪有二源

一出天台一出婺之武義西南流至東陽入縣一

百四十里東北流入上虞縣界太平寰宇記即王

子猷雪夜訪戴逵之所亦名戴溪


朱放剡溪行却  
寄新別者詩潺

潺寒溪上自此成離別回首望歸人移舟逢暮雪  
頻行識草樹漸老傷年髮惟有白雲心常向東山  
月剡窄過剡溪詩青山疊疊水潺潺路轉峰迴又  
一灣想得雪天無限好不妨獨棹酒船還王銍剡  
溪久寓詩山水戴逵宅尚餘清興中千巖落花雨  
一逕卷松風酒茗延幽子圖書伴老翁長生吾不

羨久悟  
去來同

墨池鵝池 弘治紹興府志在金庭山右軍舊居處  
也又獨秀山亦有墨池

鹿苑潭 輿地紀勝在縣西鹿苑寺源出山巔二小  
穴歲旱投簡驟雨即至



浙江通志卷十五